

EKALESIA FAAPOTOPOTOGA KERISIANO I AMERIKA SAMOA

**OFISA O A'OA'OGA KERISIANO**



**VASEGA FAAPITOA**



**FEPUARI - IUNI**

**2025**

## TUSIAOGA ASO SA VASEGA FA'APITOA – 2025

**ASO SA FEPUARI 02, 2025**

**MATAUPU: “TEUTEU LE ALA (Preparing the way)**

**TUSI FAITAU: Luka 3: 1-22**

**SINI:** Ia malamalama le fanau, pe fa'apefea ona teuteu le ala e tusa ma le galuega sa feagai ai ma Ioane le Papatiso, e pei ona fa'amatalaina e Luka.

### **FESOASOANI MO FAIAOGA:**

E ofo alofa ma fa'atalofa atu foi ia outou susuga i faiaoga Aso Sa i le amataga o tatou galuega o lenei foi tausaga ua amata. Malo le folau manuia, fa'afetai le fa'amalolosi i le fa'atinoina o la outou pitolaau, o le tapu'eina lea o le ola fa'aleagaga o fanau. Manatu lava e le faigofie la outou galuega, ae tatalo lava i le Atua i lona agaga e mafutaina lo tatou vaivai, ina ia fa'amalosia ai pea lo tatou ola galulue mo ana feau ma galuega ua valaauina iai tatou. Ia manuia le gasologa o tiute ma faiva o lenei tausaga ua tatou savalia.

### **SINA FA'ASOA MO LE MATAUPU:**

O le tatou mataupu o lenei taeao, 'Teuteu le Ala' I le tala sa tatou faitauina, o lo'o fa'amatalaina ai e Luka le tala'iga a Ioane ma lana papatisoga. O le galuega a Ioane, o le tapenaina lea o loto o tagata ina ia saunia i latou mo le o mulimuli mai, o Iesu lea. Ae le gata i lea, o le fa'ailoa atu o le Keriso, ma le feau o le papatisoga o le salamo ma le fa'amagaloina o agasala. E le faigofie la le galuega a Ioane i lea vai, ona o lo'o fa'atalitali tagata i le Keriso, a o lea ua iai le tagata o lo'o muamua mai. Na tu'u fesili tagata po'o ia ea o le Keriso, na tali Ioane; “O a'u nei le papatiso atu ia te outou i le vai, a o le maliu mai, e silisili o ia ia te a'u, e le aoga a'u ona tatala le nonoa o ona seevae; o ia lava na te papatiso ia te outou i le Agaga Paia ma le afi.”

O lo'o molimau Ioane i le eseese o lana papatisoga ma le papatisoga a Iesu Keriso, o ia e papatiso i le vai, a o Iesu e papatiso i le Agaga Paia ma le afi. O lona uiga, o le papatisoga a Ioane, o le fa'amamaina o le tino e fai ma fa'ailoga e molimau ai ua salamo le tagata, ma ua avea le fa'atofuina i le vai e fai ma ata vaaia o lona fa'amamaina. A o le papatisoga a Iesu Keriso i le Agaga Paia ma le afi, o le papatisoga e aga'i sa'o lava i le loto ma le agaga o le tagata, ma avea ai le mana o le Agaga Paia, e fai ma ala o le auai mai o le Atua na te suia le tagata mai lona agaga. O le afi foi, o le ata o le susunuina o mea tuai ma uiga tuai o le tagata mai le loto e ala i le papatisoga a Iesu Keriso.

Ua manino foi i le tali a Ioane le ituaiga tagata e iai ia, ua ia fa'ailoa i tagata, e iai le e sili atu ia te ia, ua na o ia o se teuteu ala ae o lo'o iai le o mulimuli mai, o ia foi lea o le Keriso e pei ona fesili ai tagata ia te ia. O le valaauina o Ioane, lea ua taunu'u ai upu a le Perofeta o Isaia, “O le

leo o le ua alaga i le vao, Ina teuteu ia outou le ala o le Alii, ia fa'alaulelei ona ala. E fa'atumuina o vanu uma, e fa'amaulaloina foi mauga ma mea maupuepue uma; e fa'asa'oina foi o mea piopio, ma mea gaoa e fai ma ala laulelei ia. E vaaia foi e tagata uma le fa'aolataga mai le Atua.”

E le faigofie ona sutfi loto o tagata i lea vaitau na feagai ai ma Ioane, o le vaitau o le le mautonu ma le tu'ufesili o tagata. Ae o le mea ua tatou manino ai i le galuega a Ioane, e le'i tu'ulafoaina e le Atua lana auauna. Ae ese foi le manaia o le tagata e fa'amaoni i lona valaauina mai le Atua, o le mea lea na faigofie ai le galuega a Ioane, e le'i faia i sona iloa ma lona malosi, ae sa fa'alagolago i le na valaauina o ia, o le Atua lea.

O le feau lea mo tatou le fanau, ia teuteu le ala o le Alii, o le a le uiga? Ia tapena lou loto, o le ala lena, leaga o le loto e afio tumau ai le Atua. O lona uiga, ia lelei ma mama o tatou loto, aua o le loto o le nofoaga lea o au faiga filifiliga uma, a lelei le loto, ua lelei foi mea e fai, ae a leaga le loto, ua leaga foi mea e fua mai ai. O le taua lea o le galuega a le 'au faigaluega po'o Faifeau foi, e fa'amanatu pea ma taulogologo tatou i le feau o le tala lelei, ina ia manuia o tatou ala uma.

### **GALUEGA FA'ATINO: Ia faia pea fesili e fa'atupu manatu i le vasega**

1. O le a le feau o le tala'iga a Ioane?

**Tali:** O le papatisoga o le salamo ma le fa'amagaloina o agasala.

2. Po'o ia o le Keriso? O le a le tali a Ioane ina ua fesili tagata?

**Tali:** O a'u nei le papatiso atu ia te outou i le vai, a o le maliu mai, e silisili o ia ia te a'u.

3. O a ni a'oa'oga taua ua e maua mai i le tatou mataupu o lenei Aso Sa?

### **A'OA'OGA:**

1. Ia tapena ma saunia lou tagata i taimi uma o lau savaliga.
2. Ia fai tatou ma teuteu ala o le Alii i le lalolagi.
3. O tatou o tagata e faia le galuega, e fa'ailoa atu pea Keriso i le lalolagi.
4. O le mana o le Agaga Paia, e fai ma ala o le Atua na te suia o tatou agaga.

Ia saunia e lau susuga se tatalo e fa'auma ai le vasega, ma saili se pes emo le mataupu.

## **IA MANUIA TELE SAUNIGA O LENEI ASO!!**

.....

**ASO SA FEPUARI 09, 2025**

**MATAUPU: “FAI E PEI ONA OU FAIA, AE LE PEI ONA OU FAI ATU AI”** (Do as I do, not as I say)

**TUSI FAITAU:** Luka 6: 37-49

**SINI:** Ia a'oa'o pea tamaiti, e taua i le Atua le ola fa'alogo ma usita'i, ma 'ia faia e tusa ma lona finagalo.

### **FESOASOANI MO FAIAOGA:**

Malo afua ailao ua maua i le alofa ma le agalelei o le Atua, manatu o lo'o tumua'i tutusa i tatou e ala i lana tausiga mana i lo outou soifua ma lo tatou ola. Malo le fa'amalolosi fa'afetai fai o le faiva, ua tatou o'o mai foi i le Aso Sa lona lua o lenei Masina. O le fa'amanatu lava ina ia ave pea le fa'ataua i la tatou tusi faitau o le mataupu, o le mea lea ia lava pea lou taimi e su'esu'e ai ma faitau. Ia manuia le tapenaga mo le mataupu.

### **SINA FESOASOANI MO LE MATAUPU:**

O le tatou tusi faitau o lenei aso e pei ona aumai ai le tatou mataupu, o lo'o aumai ai e Luka tala o le galuega fa'aola a Iesu ma ana a'oa'oga. O le amataga o le galuega a Iesu na ia a'oa'o atu ai ma fa'amaloloina ma'i o e na o ifo ia te ia, peita'i na le fiafia ai le 'au faresaio ma o latou fesiligia ai Iesu ina ua fa'atino ana galuega alofa i le Sapati. O lea na aoai ai loa e Iesu le 'au tusiupu ma faresaio i lo latou valea ma lo latou leiloa i le uiga o le Sapati.

O le fa'aiuga la o le mataupu lenei sa tatou faitauina, o lo'o manino mai ai le finagalo o Iesu e uiga i le amio e tataua ona ola ma soifua ai le tagata. Ina ua uma ona a'oa'o Iesu i le motu o tagata, ma ia fa'amaloloina tagata mama'i. Ona ia fa'apea atu lea i lona 'au so'o, 'Amuia outou pe a outou faia mea uma e pei ona outou vaai iai, ae talofa foi ia te outou pe a outou le faia ma outou le fa'alogo, o lo'o i le lagi lava lo outou tau.

Silafia lelei e Iesu le natura ma vaivaiga masani o le tagata, a o mea uma ia e feagai ma lona 'au so'o i le galuega tala'i. Fai mai a'oa'oga a Iesu e pei ona amata ai le tatou faitau, 'Aua tou te fa'amasino atu, ona le fa'amasinoina mai ai lea o outou, aua tou te fa'asala, ona le fa'asalaina mai ai lea o outou; ia outou fa'amagaloina atu, e fa'amagaloina mai ai outou. Ia outou foai atu, e foaiina mai ai ia te outou; e foai mai e i latou i lo outou lava ie pulpulu le fua lelei, e lolomi ma luluina, e tumu ma solo i tua. Aua o le fua tou te fuaina atu ai, e fuaina mai ai ia te outou.' O lona uiga, o mea uma lava e te faia atu i le isi tagata, pe lelei pe leaga foi, e toe foi mai lava ia te oe.

O le fa'aiuga o le mataupu, fai mai Iesu, 'O se sau ia te a'u ma fa'alogo i a'u upu, ma faia e ia, e tusa o ia ma le tagata ua fai lona fale, ua ia eli maulalo, ua tu'u le fa'avae i luga o le papa; ona sau ai lea o le tafe, ua fafati mai le vai tafe i le fale, ua le magaoioi ai lava; aua ua fausia lelei.' O lona uiga, o le ata lea o le tagata e fa'alogo i le upu ma ola ai. E le popole pe fiu gofie pe a feagai ma fa'afitauli o le ola, aisea, aua ua maua lona fa'avae. A o le tagata e fa'alogo i le upu a le Atua, ae le faia, fai mai Iesu, e tafea gofie lona fa'atuatua, o le a le uiga. E fefe vale gofie pe a tutupu faigata i le olaga. Fai mai Iesu, "Se a ea le mea e ta'ua ai a'u e outou, Le Alii e, le Alii e, a e tou te le faia mea ou te fai atu ai?"

O le fa'amanatu foi lea mo tatou le fanau, e leai lava se isi o tatou e sao mai vaivaiga nei e pei ona fa'ailoa mai e Iesu. O le mea lea e taua ai lo tatou fa'alogo ma ususita'i, o le fa'alogo i matua, o lo tatou fa'alogo lava lea i le Atua. O le tatou omai i le aoga Aso Sa, ia a'oa'oina tatou i tala o le Tusi Paia, a lelei la lau fa'alogo ma teu i lou loto, o le maua foi lena o le fa'avae o le olaga o le teine ma le tama talavou.

## **GALUEGA FA'ATINO: Fa'auma fuaitau nei**

1. \_\_\_\_\_, ona le fa'amasinoina mai ai lea o outou.
2. \_\_\_\_\_, ona le fa'asalaina mai ai lea o outou.
3. Ia outou fa'amagaloina atu, \_\_\_\_\_.
4. \_\_\_\_\_, e fuaina mai ai ia te outou.
5. O a ni a'oa'oga tau aua e maua mai i lenei mataupu?

## **A'OA'OGA:**

1. E le na o le fa'alogo i afioga a le Atua, a 'ia fa'alogo ma ola ai.
2. Ia tatou iloa, o mea uma lava tatou te faia, e toe foi mai lava ia te oe.
3. 'Aua le ola tusitusi lima, e le fiafia iai Iesu.
4. Ia maua e tatou uma le ola fa'amagalo atu, o le finagalo lea o le Atua.

**PESE:** Fa'alogo ma usita'i, e leai se isi ala

E fiafia ai Iesu, pe a fa'alogo ma usita'i.

Galue ma fa'amaoni, fiafia ma olioli

E maua ai le tau, e aumai e Iesu.

Fa'afetai tele mo le galuega o lenei taeao, ia tofi se tama e fai se tatalo ma fa'auma ai le vasega.

## **IA MANUIA LE ASO SA!!**

.....

**ASO SA FEPUARI 16, 2025**

**MATAUPU: "O MALOSIAGA O I AI"** (The powers that be)

**TUSI FAITAU:** Luka 2: 1-7

**SINI:** Ia iloa ma malamalama le vasega, po'o a malosiaga o lo'o ta'ua i le mataupu, aemaise o le tusi faitau e pei ona aumai.

**FESOASOANI MO FAIAOGA:**

E fa'atalofa atu foi i a outou susuga i faiaoga Aso Sa, talitonu lava o lo'o manuia mea uma e ala i le tausiga mana a le Atua i lo outou soifua ma so matou ola. Malo lava le onosa'i fa'afetai le fa'apalepale i tiute ma faiva o feagai ai ma outou. O upu a le aposetolo o Paulo, 'E le se mea fa'aleaoga lo outou tautiga i le feau ma le galuega a le Atua.' Ia fa'amanatu pea i le vasega, le taua o le api ma le peni, e fa'aoga i le taimi o le mataupu, ma ia tautuana lou taimi ma le tusi

faitau e pei ona tu'uina atu mol au tapenaga. Ia mafutaina pea e le Agaga o le Atua la outou galuega, aemaise o sauniga o lenei aso.

### **SINA MANATU MO LE MATAUPU:**

O le tatou matupu o lenei taeao, "O malosiaga o iai" I le tatou tusi faitau, o lo'o fa'amatalaina ai e Luka le malosiaga o folafolaga a le Atua na momoli mai e ana agelu. Tala o le fanau mai o Iesu, o lo'o amata le mataupu lenei i le poloaiga a Kaisara Aokuso, ia faia le tusiga igoa ma ia tusia uma ai le lalolagi. O le ulua'i tusiga lenei a'o pule Kurenio i Suria, fai mai na o ifo uma ai tagata, e taitasi i lana lava a'ai. O le tusiga igoa foi lenei fa'atoa feiloa'i ai Iosefa ma Maria, ua fa'ataunu'u le folafolaga na o'o ia Maria, o le a to oe, ma e fanauina se tama tane, e te fa'aigoa ia te ia o Iesu. Sa fefe Maria ina ua fa'ailoa e le agelu o le a to 'o ia, o ai se o le a le fefe, aua o se mea uiga 'ese lea tulaga, ma e o'o uma foi ia'i tatou lagona na tupu ia Maria. Peita'i, o le finagalo o le Atua e le au iai le iloa ma le potu o le tagata. O le taua o le polaiga na faia e Aokuso, o le molimauina lea o le fanau mai o Iesu

O le malosiaga la o le Atua na fa'ailoa mai e agelu, lea e iai le tala ua aumai ai le tatou mataupu o lenei aso. Fai mai le tala, ua le ofi le fale e tali ai malo, ae na o le fale o manu na avanoa mo Iosefa ma Maria. O le finagalo o le Atua, e fa'ailoa mai i mea fa'atauva'a o le olaga e le amana'ia ma vaai maualalo iai le tagata. O le fanau mai o Iesu i se nofoaga fa'apea, o le fa'aailoga o le silisili ese ma le mana o le Atua ua fa'ailoa mai i le lalolagi. E le gata o le malosiaga o le Atua e auala mai i le Agaga Paia ua fanau ai Maria, e ui e le talia gofie pe a tatou mafaufau iai fa'aletagata, ae na talia lelei e Iosefa, ona o le finagalo lea o le Atua mo la'ua. E leai lava se isi malosiaga e sili atu i le malosiaga mai le Atua, aua o le malosiaga fa'aletagata, e muta ma e le i'u lelei lona taunu'uga.

Tamaiti, o le malosiaga po'o le pule a le tagata, e iai le taimi e muta ai ma e le i'u lelei foi lona taunu'uga, aua na o le vevesi ma taua mea e tutupu mai ai. Aisea? Ona e fai i le malosi ma le iloa fa'aletagata, o lona uiga, e aunoa ma se fa'alagolago i le Atua e ona le malosi ma le potu na mafua ai ona maua tofiga o lo'o sapi ai. A o le malosiaga mai le Atua, tatou te mafaia ai mea uma ma o tatou manumalo mai ai i fa'aosoosoga ma malei a le fili. Tatou te mana'omia la le malosiaga mai le Atua, e fai ai a tatou faiga filifiliga ma fa'alagolago iai a tatou fa'ai'uga fai. O le mea ia tatou iloa, o mea uma ma fa'amanuiaga ua tatou maua, e mai le Atua lea, e leai a sa tatou mea i le lalolagi. O le potu, le malosi ma le tamaoaiga, o mea ua tu'uina e le Atua i le tagata, e fa'atino ai lana auunaga i le lalolagi nei. O le mea lea e ao ai lava ona tatou fa'amoemoe ma fa'alagolago i le Atua i taimi uma o lo tatou ola, e le se'ilogaga e tutupu puapuaga ma fa'afitauli ona fa'atoa manatua lea o le Atua, leai, o taimi uma lava o le olaga.

### **GALUEGA FA'ATINO: Fesili fa'atupu manatu**

1. O a malosiaga o lo'o ta'ua i le tatou mataupu?

**Tali:** O malosiaga sa i le poloaiga a Kaisara Aokuso a'o tula'i mai i le vaitau o le pule saua a le malo o Roma, ma le malosiaga o le Atua lea na fa'aalia ia Iosefa ma Maria.

2. O le a le poloaiga a Aokuso e pei ona fa'amatalaina?

**Tali:** Ia faia se tusiga igoa, ina ia tusia uma ai le lalolagi.

3. O ai sa pule i Suria i le vaiatau o le poloaiga a Aokuso?

**Tali:** O Kurenio

4. O le a se mea taua sa e maua mai i le mataupu o lenei taeao? (tu'u le avanoa i le vasega)

**A'OA'OGA:**

1. O le malosiaga fa'aletagata, e muta ma e le i'u lelei lona taunuuga.
2. Ia tatou mautinoa, le fa'aali mai pea o le mana ma le malosiaga o le Atua mo i tatou i aso uma o lo tatou ola.
3. O le Agaga o le Atua na te fa'amaite mea lelei i o tatou olaga.

**PESE:** O le Agaga Paia ma le afi, na te fa'asa'olotoina a'u (x2)

O le Agaga Paia ma le afi, na te fa'asa'olotoina a'u

Iesu! Na te fa'asa'olotoina a'u.

**IA MANUIA LE ASO SA!!**

**ASO SA FEPUARI 23, 2025**

**MATAUPU: "SUEGA FA'AMANATU"**

**TUSI FAITAU:** Luka 3:1-22, Luka 6: 37-49, Luka 2: 1-7

**SINI:** Ia su'esu'eina pea mafaufau o le fanau, po'o manatua tala mai le Tusi Paia sa fa'amatalaina i mataupu o lenei Masina.

**FESOASOANI MO FAIAOGA:**

Malo le galulue fa'afetai le onosa'i, ua tatou taunu'u mai foi i le Aso Sa mulimuli o lenei foi Masina, talitonu lava i le alofa tausii mai o le Atua o lo'o manuia outou uma. Ae manatu lava, ua i tou susuga lava i faiaoga le fa'atinoaina o a tatou suega fa'amanatu o Masina ta'itasi. O la outou faitalia foi lava e fa'aopoopo pe fai ai nisi fesili, po'o le fa'aoga lava o fesili ua tu'uina atu mo le vasega. Ia manuia le galuega o lenei Aso Sa.

**Fesili ma Tali:**

**Mataupu: Teuteu le Ala**

1. O ai le igoa o le teuteu ala e pei ona ta'ua i le tala?

**Tali:** O Ioane

2. O le a le eseeseega o le papatisoga a Ioane ma le papatisoga a Iesu?

**Tali:** O le papatisoga a Ioane, o le papatisoga i le vai, a o Iesu, o le papatisoga i le Agaga Paia ma le afi. O Ioane foi o le fa'amamaina o le tino, a o Iesu o le fa'amamaina o le loto.

3. O le a se feau taua sa e maua mai i lenei tala?

**Mataupu: Fai e pei ona ou faia, ae le pei ona ou fai atu ai.**

1. Na fa'atusa e Iesu le tagata e fa'alogo ma fai i le a?

**Tali:** Na fa'atusa i le tagata poto na fau lona fale, ua ia eli fa'amaulalo, ua tu'u le fa'avae i luga o le papa, ona sau ai lea o le tafe, ua fafati mai le vaitafe, ua le magaoioi ai lava; aua ua fausia lelei.

2. Ae fa'apefea le tagata e fa'alogo ae le faia?

**Tali:** Ua fa'atusa lea tagata, ua tusa o ia ma le tagata ua fai lona fale i luga o le eleele, e leai sona fa'avae, ua fafati mai iai le vaitafe, ona pau ai lea.

3. O le a se mea taua ma ni a'oa'oga sa maua mai i lea tala mo outou?

**Mataupu: O malosiaga o iai**

1. O le a le poloaiga a Kaisara Aokuso?

**Tali:** Ia faia se tusiga ia tusia uma ai le lalolagi.

2. O fea le nu'u sa alu a'e ai Iosefa ina ia tusia fa'atasi o la igoa ma Maria?

**Tali:** O Peteleema, o le aiga ma le gafa o Tavita.

3. A o ai foi le igoa o le tagata na pule i Suria i lea taimi?

**Tali:** O Kurenio.

4. Fa'amatala mai ni a'oa'oga ua e maua mai i le tala.

Fa'afetai lava mo le galuega o lenei foi Masina sa feagai ai ma outou, ia saili ane se pese ma fa'ai'u le vasega i se tatalo.

**MANUIA TELE LE ASO SA!!**

.....

**ASO SA MATI 02, 2025**

**MATAUPU: "O IESU, LE ALA, LE UPU MONI, MA LE OLA"** (Jesus, the way, the truth, and the life)



**TUSI FAITAU:** Ioane 18: 28-40

**SINI:** Ia malamalama le vasega, o Iesu na auina mai e le Atua i le lalolagi, ina ia talitonu ma fa'atuatua tagata ia te Ia.

**FA'AMANATU MO FAIAOGA:**

Ua fa'amalo le pale fa'afetai fai o le faiva, talitonu lava i le alofa o le Atua o lo'o sologa manuia mea uma e ala i le mafuta mai o lona mana e tauto'alua ma lo tatou vaivai. Manatu foi o lo'o mau pea le to'ovae o le fa'atuatua ae a le fa'atinoina o faiva o lo'o feagai pea ma outou. Ae o le tauologologo lava ina ia gasolo lelei pea la tatou galuega e ala i le a'oa'oina o fanau a le Ekalesia. O le tusi faitau lava le atoaga o le mataupu, 'ia lava pea le taimi e faitau ma su'esu'e ai, ona anoa lea o lau fa'asoa e ala i le mataupu ua tu'uina atu. Ia manuia tele le tapenaga.

**SINA FESOASOANI MO LE MATAUPU:**

O le tatou mataupu o lenei taeao, 'O Iesu, le ala, le Upu moni, ma le Ola' o le tatou tusi faitau, o le tala i le fa'amasinoina o Iesu e pei ona fa'amatalaina e le tusitala o le tusi o Ioane. O Ioane, e tulaga 'ese mai isi Evagelia e tolu, Mataio, Mareko ma Luka, i lo latou fa'amatalaina o Iesu ma lana galuega. I le vaega sa faitauina lea e iai la tatou mataupu, o le taimi tonu lea ua tu'uina atu ai Iesu i luma o Pilato.

Fai mai Pilato ia Iesu, 'e te se tupu ea oe? Tali Iesu, "O lea lava, o a'u o le Tupu. O le mea lenei na fanau mai ai a'u, o le mea foi lenei na ou sau ai i le lalolagi, ina ia ou molimau i le upu moni. O i latou uma lava o i le upu moni, e fa'alogo mai i latou i lo'u leo." O fesili a Pilato, na ia ta'utino ai, 'ou te le iloa se mea e sala ai o ia.' O le fa'amasinoga a le tagata e leai sana sala, ua pu'e fa'apagota e ona lava tagata ona o le fia tofotofo pea ia Iesu. Ae le'i avea lea tulaga e fai ma ala e 'alo ai le tali atu a le Alii i a'i latou nei, na o'o lava ia Pilato le ta'ita'i i lea vaitau. Na toe fesili lava Pilato ia Iesu, 'Po'o le a le upu moni?

O Iesu, o le tino mai lea o le Atua i le lalolagi, o ia o le ala e ui uma atu ai tagata, o lona uiga, e tatau ona fa'atuatua tagata uma ia Iesu aua o ia o le ala e tau atu i le manuia fa'avavau. E le faigofie le ala na uia e Iesu, o le ala e tumu i faigata ma puapuaga, o le ata foi lea e tatau ona o'o iai le tagata fa'atuatua. O le tusi a Ioane o lo'o amata lava, 'sa i le amataga le Upu, sa i le Atua le Upu, o le Atua foi le Upu.' O le Atua ua liutino tagata mai e ala ia Iesu, ina ia talitonu tagata uma ia te Ia. O le Upu, o le Atua sa i le amataga na ia foafoaina le lalolagi ma mea uma o lo'o iai, o le Upu e fa'amalamalama ai le pogisa o lo'o iai Iutaia ma tagata le talitou. O le fa'amasinoina o Iesu, ua maua ai le mautinoa i le tagata tu'ufesili ma le tagata le talitonu, e fa'atupu ai le fa'atuatua i le tagata le fa'atuatua, ma ia aumai le fa'amoemoe i le mea ua leai se fa'amoemoe.

Ioe le fanau, e ao lava ia'i tatou ona maua'a lo tatou ola fa'atuatua ia Iesu Keriso, aua o Ia lava na fetalai. "E le sao atu lava se tasi i le Tama, pe a le ui mai ia te A'u. Aua o Iesu, le Ala, le Upu moni, ma le Ola." O tatou o tagata o le Upu moni, e tatau ona tatou fa'alogo ma usita'i i le fetalai mai o Iesu mo i tatou e ala mai i ana Afioga Paia. E fa'apefea ona tatou maua, ia tatou fa'amaoni i so'o se valaauina ua tofofi ai tatou e le Atua tatou te galulue ai.

**GALUEGA FA'ATINO:** Ia saili ane nisi fesili mo le mataupu

1. O ai lea tagata e igoa ia Parapa e pei ona ta'ua i le tala?

**Tali:** O Parapa o le fao mea.

2. O le a le upu mulimuli a Pilato ina ua uma ona ia fesiligia Iesu?

**Tali:** Fai mai Pilato, Ou te le iloa se mea e sala ai o ia.

3. O a ni a'oa'oga sa e maua mai i lenei mataupu?

**A'OA'OGA:**

1. Ia tumau pea lo tatou ola fa'atuatua ia Iesu Keriso.
2. E maua lo tatou mautinoa, pe a o tatou talitonu ma le fa'amaoni ia Iesu le Upu moni.
3. E ao lava ona tatou fa'atuatua ma le fa'amaoni ia Iesu, ina ia manuia o tatou ala uma.
4. Fa'aopoopo ane e le faiaoga nisi a'oa'oga.

Fa'afetai tele mo le galuega o lenei taeao, ia saili se pese ma fa'ai'u le vasega i se tatalo.

**IA MANUIA TELE LE ASO SA!!**



**ASO SA MATI 09, 2025**

**MATAUPU: "FA'AILOAINA O LE MALO UA FELIUA'INA"** (Introducing the upsidedown Kingdom)

**TUSI FAITAU:** Mataio 5: 1-12

**SINI:** Ia malamalama le vasega, pe fa'aapefa ona feliu'ina e Iesu le malo e pei ona fa'amatalaina e le tusi o Mataio.

**FESOASOANI MO FAIAOGA:**

Malo le fa'amalolosi i feau ma galuega o lo'o feagai ai ma outou, manatu lava o lo'o manuia mea uma e ala i le agalelei mai o le Atua i lo outou soifua ma lo tatou ola. O lo'o fa'agasolo pea la tatou galuega, ma o se tasi foi lenei o vaega taua o itu tino o le Ekalesia ae a se lumana'i manuia o tatou fanau. Ia fa'aosofia pea moegaluaga i o tatou loto, ina ia tatou fiafia ai pea e galulue mo le Atua ma lana tala lelei. Ia manuia le tapenaga.

**SINA MANATU MO LE MATAUPU:**

I le mataupu lenei e 5, o le amataga lea o le ulua'i lauga a Iesu i luga o le mauga e pei ona fa'amauiina e Mataio. O le vaega muamua e pei ona aumai ai le tatou mataupu, o le fa'aamuiina a Iesu o lo'o tatala ai lana lauga. Ina ua lata ona ulufale Isaraelu i le nu'u folafolaina, o tulafono na ave ia Mose sa fai ma ta'ita'itama ia Isaraelu. Ua fa'apei o se talalelei ua mae'a tapenaina e le Atua ina ia ola ai tagata o lona nu'u i aso uma. Ae peita'i, sa le uma ai lava le ola femoumoua'i o

tagata. O le mafuaaga foi lea o le fa'atomuaga o lana lauga i ana upu fa'aamuia, o le upu fa'aamuia e sau mai le upu 'amuia' o le uiga o le upu 'amuia' o le 'fiafia'.

Ua tatou masani lava i so'o se failauga ma Faifeau pe a fai a latou lauga, e iai lava a latou upu e tomua ai a latou lauga ona fa'atoa o'o lea i le fa'apogai po'o le a'ano o le lauga. E fa'apea foi la le amataga o le lauga lenei a Iesu i luga o le mauga. Ua silafia lelei e Iesu manatu ma lagona o tagata i le tele o tulafono o lo'o latou tausisi i ai i aso uma. Silafia foi e Iesu, nisi o tulafono a Roma o lo'o fa'asaga ia te ia, e fete'ena'i ma ana a'oa'oga o le a fai. Atonu o le ala foi lea na fa'amuumua ai e Mataio le tulafono ma Iesu, ona o lo'o soifua ai tagata Iutaia aemaise o le lato uva feagai ai ma lo latou Atua. O Mataio o le Iutaia fa'amaoni, o le ao lafoga, e malamalama lelei foi i le tulafono; o le ala foi lea e 'ese ai lava lana molimau i le tulafono. "O le o'o mai o le Atua i le olaga o le tagata talitonu", o lana lea fa'amamafa.

Lea ua taumafai Iesu e fa'aailoa atu, ua fa'ataunu'uina uma nei tulafono ia te Ia. O lona finagalo, ia nonofo fealofani tagata uma, ma alofa le isi tagata i le isi tagata. O le fa'amamafa lea a Iesu, ina ia vave ona talia e tagata lautele ma ola ai i aso uma o le ola. O le finagalo o le Atua, e le o manatu ia o tagata. O le taimi o Iesu ma ana a'oa'oga, e le o gatasi foi ma le talitonuga o tagata i lea vaitau. Ae o lo'o manino lava e pei ona aumai e Mataio le amataga o le lauga lenei a Iesu, ua ia fa'aailoa ai le finagalo o le Atua e pei ona ia sau ai i le lalolagi, ina ia ola fiafia tagata o lona malo. E le o le malo fa'alelalolagi e pei ona mafaufau iai tagata e maua i le malosi fa'aletagata, a o le malo o le lagi ua latalata mai ina ia salamo tagata uma. Ua feliu'ina e Iesu loto o tagata mai le tausisi pea i talatu'u ma tulafono a ta'ita'i o le lotu Iutaia.

### **GALUEGA FA'ATINO: Fa'atulaga sa'o mai fuaiupu nei**

1. Amuia e fa'atupuina le filemu, \_\_\_\_\_.
2. Amuia e agamalu; \_\_\_\_\_.
3. Amuia e loto mama; \_\_\_\_\_.
4. Amuia e matitiva i le agaga; \_\_\_\_\_.
5. \_\_\_\_\_; aua e fa'amafanafanaina i latou.
6. \_\_\_\_\_; aua e maoona i latou.
7. \_\_\_\_\_; aua e o latou le malo o le lagi.

### **A'OA'OGA:**

1. E finagalo le Atua ia tatou nonofo fealofani ma alofa le tasi i le isi.
2. E leai se mea e faigata pe a pipi'i le tagata i le Alii ma fa'atuatua i lona mana.
3. Aua le fa'alagolago i lo tatou malosi, a o le Agaga o le Atua tatou te fa'amoemoe i ai.

**PESE:** Fa'alagolago, fa'alagolago, fa'alagolago i a'ao o Iesu.

Fa'alagolago, fa'alagolago, fa'alagolago i a'ao o Iesu.

Le filemu le manuia, e maua uma ia te Ia.

Fa'alagolago i a'ao o Iesu.

Ia saunia e se tama le tatalo e fa'ai'u ai le vasega, ma ia ta'u i le vasega le tusi faitau o le mataupu o le Aso Sa o lumana'i, o le galuega lena e ave i le fale.

## MANUIA LE ASO SA!!

ASO SA MATI 16, 2025

MATAUPU: “FIAFIA I LE AVEA E FAI MA SO'O” (Joy in discipleship)

TUSI FAITAU: Ioane 15: 8-11

**SINI:** Ia a'oa'oina pea le tamaiti, o le fiafia i le Atua ma avea Iesu ma tatou uo i aso uma ma faia mea uma e finagalo iai o Ia, o le avea foi lena o tatou e fai ma so'o o Iesu.

**FESOASOANI MO FAIAOGA:**

Fa'amalo atu lava le onosa'i i feau ma galuega sa feagai ai o le vaiaso, fa'afetai foi i le agalelei fa'asoa mai o le Atua i lo outou soifua ma lo tatou ola. Manatu lava o lo'o manuia tatou uma i lona alofa tausii mai. Ae o le taugologolo lava e maua ai manatu ae a la tatou galuega fai fa'atasi, ina ia manuia fanau ma lo latou ola fa'aleagaga. Ia tautuana lau tapenaga o le vaiaso, ia lava pea lou taimi ma le tusi faitau o le mataupu ua tu'uina atu.

**SINA FA'ASOA MO LE MATAUPU:**

Fai mai la tatou mataupu o lena aso, 'Fiafia i le avea e fai ma so'o' E masani lava ona tatou fa'alogi i tagata o fa'apea, e te so'o lava i lou Tama po'o lou Tina. O le mafuaaga o lea manatu, a le so'o i ai i foliga, e so'o i ai i le amio po'o ana mea e fai. O le filifiliina la o so'o o Iesu, o ni tagata e fai ma so'o i le galuega tala'i a Iesu. O lona uiga, e le gata e va'ava'ai ma maitau, a 'ia fa'aa'oa'o foi ma mulimulita'i iai i a'oa'oga ma galuega uma o lo'o fa'atinoina e le Alii.

O le mataupu lena e 15 o le tusi a Ioane, o lo'o aumai i le gagana a se tagata fai fa'atoaga, o le amataga o le mataupu o lo'o fetalai ai Iesu, 'O a'u nei o le vine moni, a o lo'u Tama o le galue vine ia.' So'o se fai fa'atoaga lava, e iloa e ia le taimi e toto ai ma le taimi e fua mai ai pe lia'i ai foi lana fa'atoaga. O Iesu la e pei ona fa'amatalaina e Ioane, o ia o le vine a le Atua, a o ona so'o, o lala o le vine. Ona fai mai lea, o la uma lava o ia te a'u e le fua, e aveeseina e ia; a o la uma e fua, e teuteu e ia, ina ia fua mai atili.' Ona fa'apea mai ai lea o le fuaiupu e 8, "E viia lo'u Tama i lena mea, pe a outou fua tele mai; ona fai ai lea outou mo'u so'o."

O lona uiga o fetalaiaga a le Alii, e taua tele le tagata e tumau i le Atua e fa'apei foi ona tumau Iesu i lona Tama. O la uma lava e pipi'i ma le fa'amaoni i le vine, o la foi ia e le taumate le fua tele mai, ma e viia ai foi le Atua. O le galuega a le fai fa'atoaga, e galue ina ia olaola lelei le fa'atoaga ma 'ia fua mai i ni fua lelei e aoga mo tagata. E fa'apena le Atua, o lo'o galue pea ina

ia fa'atumau le lelei o le tagata ma lana foafoaga, e le finagalo le Atua e fano le tagata i le agasala.

Tamaiti, o Iesu o le vine a le Atua na toto i le lalolagi, a o tatou o la o le vine a le Atua, o lona finagalo ia fua tele mai, ona fai ai lea o tatou ma so'o. O le fesili, o a fua e tatau ona atagia mai i le tagata, o le alofa, fa'amaoni, fa'alogo ma usita'i, agalelei, loto fa'amagalo, agamalu, onosa'i, tauivi, fa'aaloalo, ma isi lava mea lelei. O mea uma ia fai mai Iesu, 'Afai tou te tausia a'u poloaiga, ona tumau lea o outou i lo'u alofa; pei ona ou tausia poloaiga a lo'u Tama, ma ou tumau i lona alofa. Ua ou fai atu nei mea ia te outou, ina ia tumau ai lo'u olioli ia te outou, ia atoatoa foi lo outou olioli.'

O lona uiga, o le fiafia e avea e fai ma so'o, o le tagata lea e tumau ma pipi'i i le Atua ma tausia ana poloaiga uma. A o le tagata e tau mamao ma le Atua, e le atoatoa foi lona ola ma le i'u manuia lona olaga.

### **GALUEGA FA'ATINO: Tusiga solo**

1. Ia tu'u le avanoa i le vasega e tusi mai ai a latou solo i le autu, "O Iesu o le vine moni" a mae'a ona fa'asolo lea e faitau mai a latou solo i luma o le aoga Aso Sa atoa ma faiaoga.

### **A'OA'OGA:**

1. Ia tumau i le Atua e manuia ai o tatou olaga.
2. Ia avea tatou e fai ma tagata e tausia poloaiga a le Atua.
3. Ia fai i tatou ma lala lelei o le vine a le Atua e fua tele mai.
4. O le fiafia e avea e fai ma so'o, e fa'aosofia ai foi le fiafia e galue mo le galuega a le Atua.

**PESE:** O Iesu o le vine moni, a o lala i tatou

O i tatou o Iesu o le Loukou.

Na afio Iesu i le lagi, a e tu'ua o lenei lalolagi

Ma le poloaiga, ia outou fealofani.

Ia saunia e se tamaiti'i le tatalo e fa'auma ai le vasega, ma ta'u i le vasega le tusi faitau o le mataupu o lo'o lumana'i.

**MANUIA TELE LE ASO SA!!**

.....

**ASO SA MATI 23, 2025**

**MATAUPU: "O SE MAFUTAGA ALOFA – E INOSIA"** (A love – hate relationship)

**TUSI FAITAU:** Ioane 15: 18-25

**SINI:** Ia a'oa'oina le fanau ina ia malamalama pea, e inosia le tagata e faia le mea sa'o ma fa'amaoni i le fa'atinoina o lona valaauina, e pei foi ona inosia Iesu ma lana galuega.

**FESOASOANI MO FAIAOGA:**

E fa'atalofa atu foi i tou susuga o faiaoga Aso Sa o lenei vasega, malo le fa'amalolosi i le fa'atinoina o la outou pitolaau tauave i totonu o le Ekalesia. Talitonu lava o lo'o sologa manuia mea uma e ala i le mafuta mai o le Agaga o le Atua, e tauto'alua lo tatou vaivai. Ae o le fa'amanatu masani lava ina ia manatua lau tapenaga ia lava lou taimi ma le tusi faitau o le mataupu. Ia manuia le tapenaga.

**FESOASOANI MO LE MATAUPU:**

O upu ogatotonu o lenei fetalaiga a Iesu, ua ia fetalai ai i ona so'o, latou te le'i filifilia o Ia, a'o Ia na filifilia i latou. O lona uiga, o i tatou foi tatou te le'i filifilia le Atua, peita'i o le Atua i lona alofa tunoa na ia fa'alatalata mai ia i tatou e ala i lona valaau ua faia i lona alofa. O lenei vaega o le tusi faitau, ua fa'ailoa mai ai ma ua valaauina ai i tatou.

Ua filifilia i tatou mo le alofa. Ua valaauina i tatou, e o atu i le lalolagi uma e alolofa le tasi i le tasi. O le Kerisiano e ola i se auala e fa'ailoa atu ai le uiga o le alofa i le isi uso Kerisiano. O i tonu lava na fetalai ai Iesu i lana ta'utinoga fa'amaoni. "Afai e inoino mai le lalolagi ia te outou, ua outou iloa ua muamua ona inoino mai ia te a'u." Ua valaauina e Iesu tagata uma, latou te faia mea uma ua ia a'oa'o mai ai ma poloa'i mai ai. O i latou uma ua valaauina i le alofa tunoa o Keriso, ua ta'ua i latou o ana uo, ae le o ni auauna. Aua ua fa'ailoa mai e Iesu mea uma ua faia e lona Tama, a o le auauna na te le iloa mea ua faia e lona matai. O lona uiga, ua tatou le toe vavamamao ma le Atua, ua tatou militino ma Ia i le fa'atuatua maua'a.

Ona ua ta'ua i tatou o Kerisiano, ua avea ai foi tatou ma ana paaga. Ua tatou paaga ma lo tatou Atua, i lo tatou valaauina i ana feau ina ua avea ma Kerisiano fa'amaoni ma le fa'atuatua, ma le alofa ua fa'aalia i so'o se tagata. O le mafutaga alofa lea a Iesu ma le Tama, lea na inosia ai o Ia ma o'o ai i le Satauro. O la tatou galuega foi, o le fa'aaauu o le mafutaga alofa lea, e pei ona faia e Iesu. Aisea na mafua ai ona inosia ma tauemu iai tagata i le galuega na faia e Iesu? Ona sa fa'atino ma le amiotonu lana galuega, e le'i 'alo foi e fai le mea sa'o, aua na ia afio mai e aumai le filemu i le lalolagi.

Tamaiti, o le mafutaga alofa ma Iesu, e le faigofie lona fa'atinoina, o lona uiga e mana'omia ai le onosa'i, fa'amaoni, ma 'ia fa'alogu ma usita'i i le Atua, ona mafai lea ona fa'aauiina e le tagata. Aisea? Ona o tatou e le mafai ona tatou tumau i se mea e tasi, e ola femoumoua'i le tagata, a o Iesu lava ia, sa tumau lava le la mafutaga ma le Tama. O lona uiga, e tatau ona tumau lo tatou fa'atuatua i le Atua, aua e leai se mea e faigata ia te Ia. 'Aua tatou te fefefe e tautala sa'o ma fai le mea sa'o, tusa lava pe inoino mai tagata ia te oe, a 'ia tatou iloa, fai mai Iesu, 'Afai e inoino mai le lalolagi ia te outou, ua outou iloa ua muamua ona inoino mai ia te a'u.'

**GALUEGA FA'ATINO: Fesili fa'atupu manatu**

1. Sa iai se mea leaga na fai e Iesu na mafua ai ona inosia e tagata i lona taimi?

**Tali:** E leai

2. O le a le fetalaiga a Iesu na fai pe afai e inoino mai le lalolagi ia te outou?

**Tali:** Ua outou iloa ua muamua ona inoino ia te Ia.

3. Po'o fa'apefea mai le lua mafutaga ma le Atua? (Fai mai sau ta'utinoga manaia)

4. O a ni a'oa'oga ua e maua mai i le tatou mataupu? (tu'u le avanoa i le vasega)

**A'OA'OGA:**

1. Ia tatou loto tetele e tautala sa'o ma fai le mea sa'o, o le finagalo moni lena o le Atua.

2. Na inosia Iesu i lana galuega ona o lona alofa ia te oe ma a'u.

3. Ia fa'atino mea uma i le loto maulalo, ona fa'aeaina lea e le Atua.

**PESE:** A 'ia e tau malosi, tete'e i le fili

'Aua lava ne'i e fa'avaivai.

A 'ia e tau ma le Alii o 'au

E aoga e tutumau.

**MANUIA TELE LE ASO SA!!**



**ASO SA MATI 30, 2025**

**MATAUPU: "SUEGA FA'AMANATU"**

**TUSI FAITAU:** Ioane 18: 28-40, Mataio 5: 1-12, Ioane 15: 8-11, Ioane 15: 18-25

**SINI:** Ia maua pea le manatua e fanau o tala mai le Tusi Paia, o lo'o a'oa'oina ai pea i Aso Sa ta'itasi.

**FESOASOANI MO FAIAOGA:**

Ua tatou tuvae mai i le Aso Sa mulimuli o lenei foi Masina, malo lava le folau fa'afetai le pale i o outou faiva fa'atino i lea aso ma lea aso. Fa'afetai foi i le Atua i le ola ma le malosi tulau'i i lo tatou ola, ia tumau atu pea ia te Ia lona lava viiga e fa'avavau. Ae o le fa'atinoina o le suega, e taoto atu lava i faiaoga le faiga e fai ai. A o le mea taua, ia fa'ataunu'u ma 'ia saunia lelei ni nai fa'ailoga mo le vasega. Ia manuia le tapenaga.

**FA'ATINOGA O LE SUEGA: Fesili ma Tali**

1. O ai le Upu moni e pei ona ta'ua i le tala o lo'o aumai e Ioane?

**Tali:** O Iesu

2. Ae o le a tonu lava le atoaga o le tali a Iesu e tusa ai o fesili sa fesiligia ai o Ia e Pilato?

**Tali:** O Iesu, le Ala, le Upu moni, ma le Ola.

3. O le a le tali a Pilato ina ua uma ona ia fesiligia Iesu?

**Tali:** Ou te leiloa se mea e sala ai o ia.

4. O le a le uiga o upu fa'aamuia a Iesu i lana lauga?

**Tali:** O lo'o fa'atatau i le tagata e maua ia te ia mea ia na ta'ua e Iesu, o le tagata fiafia ma manuia lena tagata.

5. Ia lisi uma mai i lalo fa'aamuia a Iesu e pei ona maua i le tusi fautau o le mataupu? (tu'u le avanoa i le vasega e tali mai ai)

6. O le lauga lona fia lea a Iesu o lo'o i le tusi a Mataio?

**Tali:** O le lauga muamua lava lea a Iesu i luga o le mauga.

7. O ai tonu le tagata e ave i ai le upu so'o?

**Tali:** O se tagata na te tausia poloaiga a le Atua ma 'ia fua mai i lona olaga.

8. O ai le galue vine o lo'o aumai e le mataupu sa fa'amatalaina?

**Tali:** O le Atua

9. O le a le fetalaiga a Iesu pe afai e inoino mai tagata i lo tatou ona o lona finagalo?

**Tali:** Ia tatou iloa ua muamua inoino tagata ia te Ia (Iesu).

10. Fa'amatala mai lava i au lava upu. O a ni a'oa'oga taua sa e maua mai i mataupu o lenei Masina.

Fa'afetai lava mo le galuega o lenei taeao aemaise le fa'atinoina o le suega fa'amanatu a le fanau, ia fa'amanuia pea le Atua e tusa o lo outou tautiga. Ia saunia se pese ma fa'ai'u le vasega i se tatalo.

## **MANUIA SAUNIGA O LE ASO SA!!**

.....

**ASO SA APERILA 06, 2025**

**MATAUPU: "FA'ALATAINA" (Betrayal)**

**TUSI FAITAU: Luka 22: 1-6**



**SINI:** Ia malamalama le vasega i le uiga moni o le upu fa'alata, e pei ona faia e Iuta le so'o o Iesu.

### **FESOASOANI MO FAIAOGA:**

Fa'afeiloa'i atu foi i le ulua'i Aso Sa o lenei Masina ua tatou maua i le alofa tausii mai o le Atua i lo outou soifua ma lo tatou ola. Malo lava le galulue i feau ma galuega sa feagai ai o le vaiaso, fa'afetai foi le fa'amalolosi i lo tatou valaauina o faiaoga Aso Sa. Ia mafutaina pea tatou e le Agaga o le Atua, e fesoasoani i lo tatou vaivai. Ae soso atu lava ma le loto maulalo, ina ia lava pea le taimi e su'esu'e ai i le tusi faitau, ina ia nanea ai pea lau fa'asoa i le mataupu.

### **SINA MANATU MO LE MATAUPU:**

Ua tatou iai i le vaitau e fa'amanatuina ai le aga atu o Iesu i ona puapuaga ma lona maliu, e pei ona masani ai i tausaga ta'itasi. O le tatou mataupu la o lenei aso, "Fa'alataina" o le tala i le fa'alataina o Iesu o lo'o fa'amaumauina e Luka. Fai mai a o sauni ma tapena le paseka, a o le taimi foi lea sa saili ai le au ositaulaga sili ma le au tusiupu, se auala latou te fasioti ai ia Iesu ona ua latou matata'u i le nu'u. O tagata nei, o ta'ita'i ia o le lotu Iutaia, o i latou ia e tatau ona malu ai le Alii, peita'i, ua le o lea, o i latou nei ua tausolomua le malamalama ia Iesu ma lana galuega fa'aola. E mafua lea tulaga, ona o le fa'atinoina o le galuega a Iesu, e le o gatasi ma le talitonuga o lo'o tausisi i ai nei tagata.

O le taupulepulega a le au ositaulaga ma le au tusiupu o se mea e fasioti ai Iesu, na avea ma ala ua logotala ai Iuta le tasi so'o o Iesu, ma taumafai ai loa e feso'ota'i ma i latou ia. Ua ulufia e Satani le mafaufau o Iuta, ma ua galo ai lona valaauina o ia o le so'o filifilia o le Alii. Na alu Iuta ma ua fai tonu fa'atasi ma le au ositaulaga ma le au tusiupu, ma saili ai loa se togafiti e fa'alata ai Iesu. Sa totogi tupe Iuta e le vaega leaga ma fai ai loa le auala sese, ua to'ilalo i le fefe ma le tupe ae ua galo ai ua ia fa'alataina Iesu. O lona matai na valaauina ma filifilia o ia e fa'aauau le galuega. E militino ma feoa'i fa'atasi ma le Alii, ae ola masalosalo lava ma ola le talitonu i le tele o vavega ma a'oa'oga na faia e Iesu.

Ioe tamaiti, o le ta'atele ia o le vaivaiga lea ia tatou, o le mea lea e taua ai tele le fa'amanatu mai pea o lenei tala i le mafutaga a Iesu ma ona so'o filifilia. E tele ni a'oa'oga tatou te maua mai i le tala lenei, o le tele lava o tatou fai mai tatou te alolofa i le Atua, tatou te usita'i ma fa'alogo i matua, fai mai e lelei le amio, a o le fa'atinoga e matua le tutusa lava. O le mea tonu lava lena e ta'u, ua tatou fa'alataina le Alii. E le gata i lea, ia tatou mataala i so'o se taimi, aua e i ai taimi e fa'alata ai oe e le isi tagata ma tu'u atu ai le tupe ia te oe, ae fai atu e te alu e fai le mea lae mana'o i ai, 'aua ne'i e se'etia gofie ai. Ia tatou taumamao ma uiga leaga e ono avea ai tatou ma tagata fa'alata i le Atua. A 'ia fai tatou ma so'o o Iesu, tatou te fa'aauau galuega lelei ma galuega alofa e pei ona faia e Iesu mo le lalolagi.

### **GALUEGA FA'ATINO: Tusiga tala (ia le silia ma le lua parakalafa)**

1. Fa'amatala mai lava oe, pe sa i ai se taimi o lou olaga sa e faia ai se tulaga fa'apea i ou matua i totonu o le tou mafutaga i le aiga.
2. Ia fa'ai'u mai lau tala, po'o le a se aoga o lea tala mo oe?

## **A’OA’OGA:**

1. Ia tatou ‘alo’alo ese ma vaivaiga na o’o ia Iuta e le lelei.
2. Aua ne’i tatou faia ni auala sese ona o le tupe.
3. Ia tatou mataala, ua auala eseese mai fa’aosoosoga a le fili i nei ona aso.
4. Ia avea tatou ma so’o fa’amaoni ae le o le so’o fa’alata.

**PESE:** Le au so’o le malamalama o le a le uiga

Fa’ate’ia le fa’atasiga i lana fetalaiga.

Tolu sefulu, tolu sefulu

Tupe siliva, na fa’alataina ai, o Iesu.

Ia saunia e se tasi e tofia e le faiaoga se tatalo ma fa’auma ai le vasega.

## **IA MANUIA TELE LE ASO SA!!**

.....

**ASO SA APERILA 13, 2025 (Aso Sa Laupama)**

**MATAUPU: “O TOE FOUVALEGA”** (Revolutionary resilience)

**TUSI FAITAU:** Luka 22: 63-65

**SINI:** Ia a’oa’oina pea ma malamalama tamaiti, i mea na tutupu i toe taimi o puapuaga o Iesu, a o le’i fa’asatauroina o Ia ma maliu.

**FESOASOANI MO FAIAOGA:**

O lo’o tatou i ai pea i lenei vaitau o puapuaga o le Alii e pei ona tatou fa’amamaluina i lenei foi vaiaso ua tatou savalia. O taimi e mafaufau loloto ifo ai lava le tagata ia ia te ia lava, ma lona va ma le Atua po’o fa’apefea mai. Ma, e ao ai lava ona tatou tofua lagona uma lava i tiga na feagai ma lo tatou Alii o Iesu. O le ala foi lea e taua ai le fa’amanatu atu pea, ina ia fa’amaoni lau tapenaga mo le mataupu ua tu’uina atu.

**SINA FA’ASOA MO LE MATAUPU:**

O le vaiaso lenei o lo’o fa’amatalaina o le vaiaso o puapuaga o Iesu. Ae o le vaiaso foi lenei o lo’o fa’aigoaina o le vaiaso paia. A o le aso Sa foi lenei o lo’o fa’aigoaina o le aso Sa o laupama. O nei fa’amatalaga uma, o fa’amatalaga e fa’amatala ai le uiga o le vaiaso lenei mai le vaai a tagata kerisiano ona o le mea ofoofogia na feagai ma lo tatou Alii o Iesu Keriso. O le vaiaso paia, ona o le vaiaso ua fa’apaiaina ai tu’ugamau o tagata agasala ona o le maliu fasia ma le tanumia o le Alo o le Atua ua fasiotia ona o agasala a le lalolagi.

O le aso Sa o le Laupama, ona o le aso o lo'o fa'ailogaina ai le malaga fa'atupu a Iesu i Ierusalem a o alalaga "Osana" tagata sa latou fola le alatele i o latou ofu ma Laupama. O le vaiaso foi o puapuaga, ona o le vaiaso na fa'amasinoina ai, fa'atigaina ai, fa'amanu'aina ai, ma fa'asatauroina ai le Mesia valoia. O uiga eseese ia o lo'o fa'amatalaina ma fa'auigaina ai lenei vaiaso. O puapuaga o le Alii, e le na o puapuaga o lona tino, ae o puapuaga foi o lona loto ma lona agaga. O puapuaga e le gata o manu'a na fa'ao'o fa'afaasalaga e fitafita Roma, ae o puapuaga o le loto ma le agaga ona o le pouliuli o lo'o ta'ita'ia ai le nu'u o le Atua, o tagata Iutaia ma lana tapuaiga fa'alutaia.

O le tele o fete'enaiga i le va o Iesu ma le au faresaio ma le au tusiupu o le lotu Iutaia, o mataupu lava tau le tulafono na tuuina mai e le Atua. Ae peita'i, ua le fa'aogaina le tulafono ma ala o fa'amasinoga fa'alutaia, ae o lea ua fa'aoga ala fa'atulafono a le malo Roma e tau saili ai ni fa'amaoniga o moliaga sa latou faia i ala pouliuli. E ui e le'i fa'amaonia e le malo Roma moliaga na latou avatu, ae na maumau lava ina ia fasioti o ia. O le mafuaaga lea o le ogaoga o puapuaga o Iesu, ona ua valetu'ulima le fa'atuatuga i ta'ita'i o le lotu Iutaia, fa'apea foi ma ona so'o.

O le lu'itau foi lea o le vaiaso lenei o puapuaga o Iesu mo i tatou le fanau. Fa'amata o sa'o le fa'atuatuga ua tu'uina mai e lo tatou Alii fa'aola i a'i tatou? Afai e i ai se a'oa'oga taua o puapuaga o Iesu mo i tatou i lenei vaiaso, ia tatou taumafai tatou te aloalo mamao mai uiga vaivai o lo'o fai ma mafuaaga e puapuaga ai pea lo tatou Alii ona o i tatou le fanau le fa'amaoni, le usita'i ma fa'alogi i le Atua. Ia tatou lagonaina ma tatou fa'apea ifo, o tatou lava o tagata fouvale i luma o le Atua, e ala i a tatou amio fa'aalia i taimi uma ma aso uma o le olaga.

### **GALUEGA FA'ATINO:**

1. Ia fai sina ata pu'upu'u e fa'atino ai le tala e pei ona fa'amatalaina, o le isi foi lena auala e malamalama atili ai le vasega, ia le gata o le fa'alogi, a 'ia fa'atino e taofi mau ai i o latou mafaufau.

### **A'OA'OGA:**

1. Ia tatou taumamao ma le fai o uiga ma amioga e puapuaga ai pea lo tatou Alii.
2. Ia tatou lagonaina le taua o lenei vaiaso paia, ina ia fa'aloloto ai pea lo tatou ola fa'atuatua i le Atua.
3. O puapuaga o le Alii, ua tatou ola fialia ai ma fa'asa'olotoina ai tatou mai le pologa i le agasala.

Fa'afetai lava mo le galuega o lenei taeao, ia saili se pese o le aso Sa Laupama, ma saunia e le faiaoga se tatalo e fa'auma ai le vasega.

**IA MANUIA LE ASO SA LAUPAMA!!**



## **ASO SA APERILA 20, 2025 (Aso Sa Eseta)**

**MATAUPU: “UA TOETU O IA” (He is risen)**

**TUSI FAITAU:** Luka 24: 1-8

**SINI:** Ia a’oa’o le vasega ia malamalama i le tala o le toetu, e pei ona aumai ma fa’amatalaina mai e le tusi o Luka.

### **FESOASOANI MO FAIAOGA:**

Taeao manuia, taeao fiafia i le alofa ma le agalelei fa’asoa mai o le Atua i lo outou soifua ma lo tatou ola. O le taeao foi o lo’o tatou fa’amanatuina ai le toetu manumalo o lo tatou Alii o Iesu Keriso. O le tala o le toetu ua tatou masani ai e pei ona fa’amanatuina i tausaga ta’itasi, ae o le taua o la tatou galuega, ia malamalama le fanau e i ai lava mea e eseese ai le fa’amatalaina e le au faievagelia. O le mea lea, e taua ai le lava o lou taimi e su’esu’e ai le tatou tusi faitau e pei ona tu’uina atu o le mataupu.

### **SINA FESOASOANI MO LE MATAUPU:**

E i ai le talitonuga, ua nofo silafia e le to’atele o susuga i faiaoga, le i ai o nai eseese, i fa’amatalaga ma fa’amauga a le au fai-evagelia e uiga i Tina na ala usu e asi le tu’ugamau. O le mataupu o lenei aso Sa, o le a tulimata’ia le fa’amatalaina e Luka o Tina na usu i le tu’ugamau, ina ia maua ai se feau mo tatou. O lo’o manino le tala le molimau a Luka, e to’atolu Tina na o i le tu’ugamau, o Maria le Makatara, ma Ioana, ma Maria le Tina o Iakopo. O lagona o lea taeao o lo’o taoto i totonu o le tala ma le vaaiga o lo’o fa’amatalaina, o lagona o le le mautonu ma le fememea’i. O lagona o le misialofa ia Iesu fa’atasi ma le masalosalo, ua feifiloi fa’atasi ma le ita, ina ua leai le Alii o Iesu i totonu o le tu’ugamau.

O le leiloa lilo lea o lo’o taoto i fafo mai o le tu’ugamau, o le leiloa o Tina ia Iesus a o latou mafuta ma feoa’i, a’o i ai i le galuega tala’i. O lo’o atagia ai le le manino, o Iesu na afio mai e maliu, ma o le a toetu mai i le aso tolu. O le taua o le molimau a Luka i le toetu o Iesu, ona o lo’o fa’amatalaina ai le taunu’u atu o i latou, ma ulu atu i totonu o le tu’ugamau. A fa’amatalaina i se uiga fa’afaigofie, o lea lava ua o’o atu Tina nei se’i momoli atu lo latou leiloa sa nunumi solo i fafo mai o le tu’ugamau, se’i fa’amalamalama i totonu o le tu’ugamau, e ala i le loto talitonu ma le mautinoa. Le pogisa fa’aleagaga o le tagata ia Iesu le Fa’aola, lea ua fa’amalamalamaina i totonu o le tu’ugamau, ina ua suluia i le malamalama moni o le Keriso toetu.

O le fesili mo i tatou uma lava, po o tumau ea lo tatou leiloa i lo tatou Alii Fa’aola o Iesu Keriso? Ua a’oa’o mai lenei tala mo i tatou uma, ina ia o tatou talitonu ma le fa’amaoni ua toetu manumalo lo tatou Alii o Keriso. Ia manino foi tagata Kerisiano uma, o le pogisa o le tu’ugamau, ua fa’amalamalamaina e le manumalo o le Keriso toetu. O le fememea’i foi ma le le mautonu o le tu’ugamau, ua aumai ai le mautinoa ma le fa’amoemoe ola i le tagata fa’atuatua fa’amaoni i le Keriso toetu.

### **GALUEGA FA’ATINO: Taliga fesili**

1. E to’afia Tina na ala usu i le tu’ugamau e tusa ai ma le molimau a Luka?

**Tali:** E to'a tolu

2. A o ai igoa o ia Tina?

**Tali:** O Maria le Makatara, ma Ioana, ma Maria le Tina o Iakopo.

3. E to'afia tagata na fa'aali i Tina i le tu'ugamau?

**Tali:** E to'alua.

4. O le a le fesili na fesili ai i laua, ina ua punou o latou mata i le eleele?

**Tali:** Se a le mea tou te saili ai le ua soifua i e ua oti?

5. O le a tonu le taimi na usu ai nei Tina i le tu'ugamau?

**Tali:** O le tafa o ata le taimi o lo'o ta'ua e Luka.

### **A'OA'OGA:**

1. O le manumalo o Keriso, o le tala lelei mo tagata uma.
2. Ia tatou fiafia pea e molimau i le toetu o Iesu.
3. Ia toetu Keriso i o tatou loto, e te'a ai le fememea'i ma le popole vale pe a tutupu fa'afitauli o le olaga.

Malo lava mo le galuega o lenei aso Sa, ia saili se pese o le toetu, ma saunia e le faiaoga se tatalo e fa'auma ai le vasega.

## **IA MANUIA LE ASO SA TOETU!!**



### **ASO SA APERILA 27, 2025**

#### **MATAUPU: "SUEGA FA'AMANATU"**

**TUSI FAITAU:** Luka 22: 1-6, Luka 22: 63-65, Luka 24: 1-8

**SINI:** Ia su'esu'eina pea mafaufau o le fanau, po'o manatua tala o le Tusi Paia e pei ona fa'amatalaina i mataupu o lenei Masina.

#### **FESOASOANI MO FAIAOGA:**

Ua tatou o'o mai foi i le Aso Sa mulimuli o lenei Masina, malo lava le fa'atoatoa fa'afetai onosa'i i faiva alofilima o lo'o feagai pea ma outou. Manatu foi o lo'o tumua'i tutusa i tatou i le alofa tausii mai o le Atua. Ae o le gasologa masani lava o a tatou galuega, o le ala foi lea e fa'amanatu ai lava, ina ia fa'ataunu le faiga o tatou suega, ma 'ia fa'amaumau lelei togi a le vasega, ae taoto atu lava ni nai fa'ailoga mo tamaiti.

## **FA'ATINOINA O LE SUEGA:**

### **Mataupu: "FA'ALATAINA"**

1. O ai foi le igoa o le so'o na ia fa'alataina Iesu?

**Tali:** O Iuta le Sekara

2. A o ai na tautalatala ma Iuta, ma o latou ave i ai tupe?

**Tali:** O ositaulaga sili ma ta'ita'i o 'au.

3. Aisea ua fai ai e Iuta lea mea leaga ia Iesu?

**Tali:** Ona ua ulufia e Satani.

4. O a ni a'oa'oga sa e maua mai i lea mataupu sa fa'amatalaina?

(tali mai lava le tamaititi i ana lava upu)

### **Mataupu: "O TOE FOUVALEGA"**

1. O a toe fouvalega na faia ia Iesu?

**Tali:** O tagata ua latou taofi ia Iesu, ma ua latou sasa ma po i ona fofoga, ma lafo upu leaga ia te Ia.

2. O le a le fesili na o latou fesiligia ai Iesu?

**Tali:** E te iite mai, po o ai na na po atu ia te oe.

3. A o le a le taimi na faia ai e i latou lea galuega le alofa ia Iesu?

**Tali:** O le po atoa, pe fua i le molimau a Luka.

4. O le a se feau o lo'o momoli mai e lenei mataupu mo oe?

(tu'u lava le avanoa i le vasega)

### **Mataupu: "UA TOETU O IA"**

1. E to'afia Tina na o e asi le tu'ugamau e tusa ma le molimau a Luka?

**Tali:** E to'atolu

2. O ai o latou igoa, ae o le a tonu foi le taimi na o ai?

**Tali:** O Maria le Makatara, ma Ioana, ma Maria le Tina o Iakopo, ae o le tafa o ata le taimi na ala usu ai nei Tina.

3. E to'afia agelu na fa'aali i Tina i le tu'ugamau?

**Tali:** E to'alua

4. O e lagonaina le taua o lenei vaitau e pei ona tatou fa'amanatuina, e le gata o puapuaga o le Alii, ae fa'apea foi ma lona toetu manumalo?

Fa'afetai tele mo le fa'atinoina o galuega ae a fanau ma lo latou ola fa'aleagaga, ia saga fa'amanuia pea le Atua. Ia saili ane se pese e fa'auma ai mataupu o lenei Masina.

## MANUIA TELE LE ASO SA!!

ASO SA ME 04, 2025

MATAUPU: "I LALO O VINE MA MATI" (Under the vines and fig trees)

TUSI FAITAU: Mika 4: 1-4

**SINI:** Ia iloa ma malamalama le vasega, po'o le a le uiga o le valoaga a Mika e pei ona fa'amatala e le tusi faitau o le mataupu.

### FESOASOANI MO FAIAOGA:

Fa'amalo atu lava le fa'amalolosi, fa'afetai foi le lava papale i lavasiga o le vaiaso sa feagai ai ma outou. E vivi'i a'e foi o tatou loto i le Atua, ona o lona mana lavea'i mo i tatou le fanau agasala. O le tatou galulue so'oso'o tau'au foi e manuia ai a tatou feau ma galuega fa'agasolo e pei ona iai nei. O le mafuaaga foi lea, e le mapu ai lava le taulogologo ina ia lava pea sou taimi e faitau ai ma su'esu'e i le tusi faitau, aua o le atoaga lena o lau tapenaga i le mataupu.

### SINA FA'ASOA MO LE MATAUPU:

O le valoaga lenei a Mika i le mea e tupu ia Ierusalem, lea o lo'o fa'alupe e Mika "o le mauga o lo'o i ai le fale o le Alii." Fai mai le valoaga a le perofeta, o le mauga lea e a'oa'o mai ai tulafono ma le afioga a le Alii. O le mauga foi lea, e a'oa'o mai ala ma amioga mai le Alii. O le mauga foi e sau ai le fa'amasinoga tonu mai le Alii. O le mauga foi e aumai ai a'oa'iga sa'o mai le Alii mo tagata uma.

O le pule aoao lea fa'ale-Atua e maua ai manuia uma o le tagata. O le pule e a'oa'o mai ai tulafono mai le Atua. O le pule aoao e a'oa'o mai ai ala ma amioga e finagalo ai le Atua. O le pule aoao a le Atua e aumai ai le fa'amasinoga tonu fa'ale-Atua. O le pule aoao e a'oa'i mai ai foi le tagata i mea ua fa'atamala ai. O le manuia, e le se mea e maua e le tagata i sona lava malosi po'o sona potu. E leai. O le manuia i mea uma lava, o le manuia e maua mai le Atua o le ona manuia uma. O manuia o le tino nei, o manuia o le mafaufau ma le atamai, fa'apea foi ma manuia fa'aleagaga. O le tafatolu lea o manuia a o'o ina fa'amanuia mai ai le Atua i le tagata, ona maua lea o le mea e taua o le filemu moni mai le Atua. Aisea? Aua foi ua leai se atuatuvaale, leai se popole, leai foi se matau o le tino, le loto ma le agaga.

O le valoaga a Mika o lo'o fa'ai'u i le fa'amoemoe ina ia tu'i e fitafita ma 'au tau a latou pelu e fai ma uamea o suotosina, fau foi a latou tao ma polo teu vine, 'aua foi ne'i toe a'oa'oina tagata i nit aua. "A e ta'itasi ma nofo i lalo o lona vine, ma lalo o lona mati; e leai foi se na te fa'amatau

mai; aua ua fa'apea ona tulei mai ai le siufofoga o le Alii o 'au. Aua o nuu uma e ta'itasi ma savali i le igoa o latou atua, o i tatou foi, tatou te savavali i le suafa o le Alii lo tatou Atua e fa'avavau fa'avavau lava."

O se valoaga ua tataua ona atagia mai i soifuaga o tagata ma le lalolagi, aua o le auala lea e fofo ai le vevesi ma le fetaua'i. 'Aua ne'i toe faia ni mea tau, 'aua foi ne'i toe a'oa'oina tagata i ni taua. O le auala foi lea e mafai ona tatou taofia ai le feitaga'i ma le fefulituaa'i, i totonu o mafutaga ma aiga, nu'u ma le atunu'u, fa'apea foi Ekalesia ma so'o se fa'alapotopotoga. E o'o lava foi i totonu o aoga, mo tatou le fanau, ia saili i auala e maua ai le filemu, ma 'ia tauivi mo le manuia o lou lumana'i aemaise o lou aiga.

### **GALUEGA FA'ATINO: Taliga fesili**

1. O le a le tafatolu o manuia lea e fa'amanuia ai le Atua i le tagata?

**Tali:** O manuia o le tino nei, manuia o le mafaufau ma le atamai, fa'apea manuia fa'aleagaga.

2. O a uiga o upu nei?

**Polo** – o le naifi (agaese) e fa'aoga e teu ai laau

**Suotosina** – o le meafaigaluega e fa'aoga e fa'amalu ai le eleele.

3. O le a le uiga o le valoaga a Mika?

**Tali:** O manuia e o'o i aso amuli.

### **A'OA'OGA:**

1. O manuia ua tatou maua e le o so tatou malosi po'o so tatou poto, a o le Atua e ou manuia uma.
2. Ia tatou saili auala e maua ai le filemu ae le o le vevesi.
3. 'Aua ne'i galo ona fa'afetai i le Atua i manuia ua tatou maua.

**PESE:** #92 (Pese ma Viiga)

Ia tofi e le faiaoga se tama e fa'ai'u le vasega i le tatalo.

## **IA MANUIA LE ASO SA!!**

.....

**ASO SA ME 11, 2025**

**MATAUPU: "FOLAFOLAGA, FOLAFOLAGA"**

**TUSI FAITAU:** Iosua 1: 1-18

**SINI:** Ia a'oa'o le vasega, o lo'o olaola pea folafolaga a le Atua mai le taimi o Mose ma Iosua, e o'o mai lava i o tatou foi taimi.



## **FESOASOANI MO FAIAOGA:**

E fa'afeiloa'i atu ia te outou uma i lenei aso fou ua tatou maua, talosia i le tausiga alofa a le Atua, sa manuia ai faiva na feagai ai o le vaiaso. Malo lava le folau manuia, ua tatou oaoa i faleseu ma sa'a i ma'a o malie, i le agalelei fa'asoa mai o le Atua i lo outou soifua ma lo tatou ola. O le fa'amanatu lava ina ia lelei ma matagofie lau tapenaga o le vaiaso. O le tatou tusi faitau lava, ia i ai lava se taimi e te lua mafuta ai mo au su'esu'ega. Ia manuia le tapenaga.

## **FESOASOANI MO LE MATAUPU:**

O le tatou mataupu o lenei taeao, 'FOLAFOLAGA, FOLAFOLAGA' o folafolaga a le Atua na tu'uina ia Mose, e fa'atonu folau ai lona nu'u o Isaraelu. O le tatou tusi faitau la, o le tofiaina o Iosua e fa'aauau le fa'ataunu'uina o folafolaga a le Atua, ina ua oti Mose. Fai mai le Atua ia Iosua, 'Ua oti Mose la'u auauna, o lenei foi ina e tulai atu ia, ia sopoia atu Ioritana lena, o oe, atoa ma lenei nu'u uma, e o i le nuu ua ou foaiina atu ai ia te outou, o le fanauga a Isaraelu lava.' O fuafuaga alualu mamao a le Atua mo lona nu'u, ua uma ona fa'ataoto le alafua e savavali ai, o ana folafolaga foi, ina ia taunu'u Isaraelu i le nu'u folafolaina, o Kanana.

O upu fa'amalosi ma fa'alototele i lana auauna o Iosua, e fa'aauau ai le ta'ita'iga o le nu'u, ina ia tulaeleele i le nu'u na tauto ai le Atua ia Isaraelu. E le faigofie ia Iosua le tofia fa'afuase'i o ia e fa'aauau le malaga, aemaise o le sauni atu e sopoia le Ioritana. O le Ioritana o lo'o i ai le Leviatana e fano ai le ola, ma le loloto e magoto ai le fa'atuatua o le tagata, ma le tele o faigata o fa'amalumu mai i le Ioritana, e fai ma fa'avaivai loto ia Iosua ma lana ta'ita'iga.

Peita'i, e le tu'ulafoa'ia e le Atua lana auauna o Iosua, e ui i nisi mafauauga na tutupu a'e ia Iosua, ae na maua lona lototele i upu fa'amalosi na fetalai ai le Atua, o le na tofia o ia. O le Atua na ia tofia Iosua, o ia foi na te galue ma fa'amalosi le loto o lana auauna, ina ia manuia lana ta'ita'iga. O le Atua lava ia e tumau ma fa'amaoni i ana folafolaga na fai mo lona nu'u, a o le tagata lava ia e ola femoumoua'i ona e le tumau i se mea e tasi. Fai mai le Atua ia Iosua, 'Ia e fa'amalosi, ma loto tele; aua e te fefe, aua e te mata'u; aua o le Alii lou Atua o lo'o ia te oe i mea uma e te alu i ai.'

Tamaiti, e fa'aogaina e le Atua tagata uma mo le fa'ataunu'uina o ana folafolaga, ua uma foi ona saunia e le Atua ana fuafuaga mo le tagata valaauina. E tele lu'itau e feagai ma o tatou tagata i la tatou savaliga, a 'ia tatou iloa, e le mafai ona tu'ulafoa'iina tatou e le Atua. E eseese uma lava mea e valaauina ai i tatou e le Atua, tatou te galulue ai ina ia manuia o tatou olaga. O le Atua e ona tofiga, o ia foi na te mafutaina i tatou ma fa'alototele mai i lo tatou vaivai. O le mea sili ona taua i le Atua, ia tatou fa'amaoni, usita'i ma fa'aloge e manuia ai. Ua uma foi ona ia folafola manino mai manuia mo i tatou i le lumana'i, pe a o tatou tumau ia te ia ma le loto talitonu ma le fa'atuatua maua'a.

## **GALUEGA FA'ATINO: Fa'auma fuaiupu nei mai le tusi faitau**

1. O mea uma lava e solia e o outou alofivae, \_\_\_\_\_, \_\_\_\_\_.
2. \_\_\_\_\_; aua e te tofia mo lenei nu'u le laueleele na ou tauto ai i o latou Tama e foai atu ia te i latou.

3. Ou te lei fai atu ea ia te oe? Ia e fa'amalosi, \_\_\_\_\_; \_\_\_\_\_, \_\_\_\_\_; \_\_\_\_\_.

**A'OA'OGA:**

1. Ia tatou loto tetele e fa'atino lo tatou valaauina ma le fa'amaoni.
2. E le tu'ulafoa'iina tatou e le Atua mo lana galuega.
3. E tumau le Atua i ana folafolaga.

Ia saili ane se pese mo le tatou mataupu, ma saunia e le faiaoga se tatalo e fa'ai'u ai le vasega.

**IA MANUIA TELE LE ASO SA!!**

.....

**ASO SA ME 18, 2025**

**MATAUPU: "FAI MA SUI O LE ATUA"** (Representing God)

**TUSI FAITAU:** Iosua 7: 1-15

**SINI:** Ia malamalama le vasega, po'o ai ua fai ma sui o le Atua, ae po o a foi mea e iloa ai lea tagata.

**FESOASOANI MO FAIAOGA:**

Sa o tatou talanoa i le Aso Sa ua tuana'i atu, i le tofia ai o Iosua na te fa'aauuina le malaga a Isaraelu i Kanana, leaga e tatau ona fa'ataunu'u le folafolaga a le Atua mo lona nu'u filifilia. O lenei la taeao, o lo'o tatou fa'aaauu pea ona talanoa ia Iosua le auauna filifilia a le Atua. Manatua foi, o Iosua na tofia e le Atua, o ia foi la, lea o lo'o fai ma sui o le Atua ia Isaraelu uma, na te fa'aleoina ma fa'atinoina le finagalo o le Atua mo lona nu'u. I le tatou tusi faitau, o lo'o fa'amatala mai ai mea na tutupu i le tagata e igoa ia Akana, ma le leaga o lana mea na fai na mafua ai ona agasala le nu'u.

O Kanana o le nu'u na tauto ai le Atua ia Isaraelu e fai mo latou, o le nu'u fai mai e tafe ai le suasusu ma le meli. O lea la ua nofoia e Isaraelu ma ua latou molimauina le moni ma le fa'amaoni o folafolaga a le Atua ia i latou. Peita'i, ua le o gatasi le finagalo o le Atua ma amioga a tagata na fa'aalia, ua moni ai se tasi o fuaitau a lo tatou atunu'u. "Ua 'ai ulu tuana'i ta'isi." Ua maua manuia e tele ona galo lea o le Atua, na afua ai ona maua manuia. O le mea la ua tupu, ua ave e Akana ni mea ai mea na fa'atoina e le Atua, ma ua tanumia i le eleele i totonu o lona fale ie. Ona tupu ai lea o le toasa o le Alii i le fanauga a Isaraelu, ona o le mea na faia e Akana, ua ia mana'o i mea na fa'atoina e le Atua.

O mea ua fa'atoina e le Atua, e sa ona ave 'ese fa'agaoi e se tagata, o mea e patino lava i le Atua, o le ala lea na ita tele ai Iosua, ona agasala le nu'u ma ua soli la latou feagaiga na osi ma le Atua, ua latou fa'a'ole'ole foi i o latou laugutu. E ui lava ina toasa le Alii ona o amioga a Isaraelu, ae le

mafai ona aveese ai lona alofa lavea'i mo lona nu'u filifilia. Na fetalai le Atua ia Iosua, "Ina tulai ia, ma fa'apaiaina le nuu, ma e faapea atu, Ia fa'apaiaina outou e outou a taeao; aua o loo faapea ona fetalai mai o le Alii le Atua o Isaraelu, Isaraelu e, ua ia te oe le mea ua faatoina; e te le mafaia ona tu i luma o e ita ia te oe seia outou aveesea ia te outou le mea ua faatoina."

O Iosua ua fai ma sui o le Atua, na te fa'apaiaina le nuu o Isaraelu, ua tu'uina atu e le Atua le pule ma le mana, aemaise o le malosi ina 'ia mafai ai ona fa'alogo ma usita'i tagata ia te ia. O le malosi lea na mafai ai e Iosua ona fa'apopototo le nu'u, ma ia fesiligia ai Akana i le mea na ia faia. Na ioe Akana ma ia fa'apea ai ia Iosua, ua ou agasala lava i le Alii le Atua o Isaraelu, na aauina atu lea e Iosua ana auauna ina ia aumai mea uma na aveeseina e Akana. O le iuga na o'o ia Akana, na fetogi o ia i maa ma o latou susunuina i le afi, ma 'ua latou faaputuina ai faupuegamaa i lea mea. Ma ua fa'aigoaina ai le igoa o lea ma'a, "O le vanu o Akori."

### **GALUEGA FA'ATINO: Taliga fesili**

1. O ai na fai ma sui o le Atua e tusa ai ma le tala sa fa'amatalaina?

**Tali:** O Iosua

2. O a mea na aveeseina e Akana na afua ai ona toasa le Alii?

**Tali:** O le ofu Senara, o sekeli ario e lua selau, ma le potopotoga auro e lima sefulu o sekeli o lona mamafa.

3. O le a le iuga na o'o iai Akana?

**Tali:** Na fetogi i maa ma susunuina i le afi ma oti ai o ia.

4. O le a le igoa na fa'aigoaina ai le faupuegamaa?

**Tali:** O le vanu o Akori.

### **A'OA'OGA:**

1. Ia tatou faaeteete i mea e le o'o i ai lo tatou malosi ma le iloa.
2. E le i'u lelei le tagata e faa'ole'ole i le Atua.
3. Ia fai i tatou ma sui o le Atua i le lalolagi, ia atagia i le amio ma mea tatou te faia.

**PESE:** #157 (Pese ma Viiga)

**IA MANUIA SAUNIGA O LE ASO SA!!**

ASO SA ME 25, 2025

MATAUPU: "SUEGA FA'AMANATU"

**TUSI FAITAU:** Mika 4: 1-4, Iosua 1: 1-18, Iosua 7: 1-15

**SINI:** Ina ia fa'aosofia pea lagona ma mafaufau o le fanau, e matau ma taofi tala mai le Tusi Paia e pei ona a'oa'oina ai.

**FESOASOANI MO FAIAOGA:**

Soifua manuia ma le lagi mama i a outou susuga i faiaoga Aso Sa o le tatou vasega i lenei aso fou ua tatou maua i le alofa o le Atua. Talitonu lava o lo'o maua pea lo outou malosi mai le Atua aua le fa'atinoina o la tatou galuega fa'aauau. Malo lava le onosa'i i tiute ma faiva o lo'o feagai ai ma outou. E taoto atu lava le fa'atinoina o tatou suega, e pule lava pe fa'aoga fesili ua tu'uina atu, poo le saili ane foi o nisi fesili e fa'aopoopo i ai.

**FAATINOGA O LE SUEGA:**

**Mataupu: I lalo o Vine ma Mati**

1. O le a le uiga o le valoaga a Mika?

**Tali:** O manuia e o'o i aso amuli.

2. O le a le tafatolu o manuia e maua e le tagata mai le Atua?

**Tali:** O manuia o le tino, mafaufau, ma le agaga.

3. O a uiga o upu nei?

Polo – o le naifi (agaese) e teu ai laau

Suotosina – o le mea faigaluega e fa'amalu ai le eleele.

**Mataupu: Folafolaga, Folafolaga**

1. O a folafolaga a le Atua na fai ia Iosua?

**Tali:** E tulai ma o i le nu'u ua ia foaiina ai ia te i latou, o le fanauga a Isaraelu lava.

2. O le a le igoa o le vai tafe tele o lo'o ta'ua i le tusi faitau?

**Tali:** O Eufirate

3. O ai le igoa o le Tama o Iosua?

**Tali:** O Nuno

4. O a ni a'oa'oga sa outou maua mai i lea mataupu? (tu'u le avanoa i le vasega)

**Mataupu: Fai ma sui o le Atua.**

1. O ai na fai ma sui o le Atua e tusa ai o le tala sa fa'amatalaina?

**Tali:** O Iosua

2. Aisea na toasa ai le Alii i lona nu'u?

**Tali:** Ona o le mea na fai e Akana, ua ia aveese mea mai mea ua fa'atoina e le Atua.

3. O le a le igoa na fa'aigoa ai le faupuegamaa tele?

**Tali:** O le vanu o Akori.

4. Se mea lelei le mea na fai e Akana?

**Tali:** E leai, e leaga

Malo lava mo le fa'ataunuuina o le tatou suega o lenei Masina, ia saili ane se pese ma saunia e se tama le tatalo e fa'ai'u ai le vasega.

## MANUIA SAUNIGA O LE ASO SA!!

---

**ASO SA IUNI 01, 2025**

**MATAUPU: "VAAI MA AVEA MA MALAMALAMA"** (Beholding and becoming light)

**TUSI FAITAU:** Luka 11: 14-36

**SINI:** Ia malamalama tamaiti, i le uiga moni o le vaai o lo'o fa'amatala e le tusi o Luka e pei ona aumai ai le mataupu.

**FESOASOANI MO FAIAOGA:**

Malo lava le fa'amalolosi i feau ma galuega fa'agasolo o lo'o feagai pea ma outou, manatu foi o lo'o maua pea lo outou malositu tulu'i e ala i le tausiga alofa a le Atua i lo outou soifua ma lo tatou ola. Fa'afetai foi mo le fa'atinoina o la tatou galuega o le tapu'eina lea o le ola fa'aleagaga o fanau a le tatou Ekalesia ma le atunu'u. O le fa'amanatu masani lava ina ia lava lou taimi ma le tusi faitau, o le atoaga lava lena o lau tapenaga.

**FA'ASOA MO LE MATAUPU:**

O le tatou mataupu o lenei taeao, "Vaai ma avea ma malamalama" e i ai le eseese o le vaai a le tagata. O isi tagata e vaai ae le malamalama i se mea o lo'o vaai i ai, a o isi foi e le gata ina vaai, ae malamalama foi i le mea lae vaai i ai. Fai mai Luka, 'O mata, o le moli lea o le tino; o lenei, pe afai ua lelei ou mata, e malamalama uma ai lou tino; a e afai ua leaga, e pouliuli ai lou tino. O lenei, ia oe, ne'i pogisa le malamalama ua i totonu ia te oe.' O lona uiga, o mata, o se tasi lenei o vaega taua o le tino o le tagata na faia e le Atua ina ia iloa ai le matagofie o mea uma na ia faia o le foafoaga. O lo'o aumai e Luka le itu taua o mata e le gata o le vaai, a 'ia vaai, matau ma malamalama i le gasologa o le galuega fa'aola a le Alii.

O Iesu o le malamalama moni mai le Atua, na auina mai e aumai le malamalama e fa'amalamalama ai le lalolagi pogisa. O lo'o tatou i ai pea i le vaiata o le toetu e pei ona tatou fa'amanatuina, o le malamalama lea o le tala lelei mo le lalolagi o lo'o pouliuli i le agasala. Le malamalama o le Keriso toetu e ao ona manino ai le vaai a tagata uma, ma 'ia ola ma savavali ai i

ala o le malamalama. O le avea o le tagata ma malamalama, ia tumau le ola talitonu ma fa'atuatua i le Keriso manumalo. Aua a leai Keriso i le olaga o le tagata, o le nenefu foi lena ma pogisa mata fa'aleagaga o le tagata. Aua fai mai Paulo, 'Aua ua le ola a'u, a o Keriso ua ola i totonu ia te a'u.' A o'o ina ola Keriso i totonu o le tagata, e tatau foi ona fa'aalia mai i ona uiga ma lana amio le soifua o Keriso. O lana vaai foi, o le vaai a le tagata fa'atuatua, e malamalama uma ai le tino.

Ae a aunoa le tagata ma le malamalama o le Keriso toetu, o lona uiga o le a ola foi lea tagata ma savali i ala o le pogisa. O le malosiaga o le galuega talai a Iesu, o le mafuta lea i lona Tama i le tatalo, lea foi na ia a'oa'o ai i lona 'au so'o. O le auupega foi lea e tatau ona fa'aoga e le tagata ua avea ma malamalama ina 'ia fa'atumau ma fa'aauuina ai le olaina o Keriso i lona loto.

Tamaiti, ia fa'apupulaina o tatou mata i le malamalama o le Keriso manumalo, ina ia tatou iloa ai ona ola fa'autauta ma matata'u i le Atua. E tele fa'afitauli e lu'itauina ai pea lo tatou ola, a 'ia toto'a pea la tatou vaai ma ia susulu pea le malamalama o Keriso e fa'amalamalamaina ai tatou. Ia ola pea le Keriso i totonu ia i tatou, ma ia tatou loto tetele e tala'i atu lona finagalo e lavea'iina ai e o mafatia ma puapuagatia.

#### **GALUEGA FA'ATINO:**

1. Ia fai ni fesili e fefa'asoa'i ai ma le vasega, ina ia tatala mai ai o latou mafaufau e malamalama atili ai i le mataupu
2. Po o le tu'u ai foi o le avanoa e toe tusi mai ai, pe tasi se parakalafa e toe fa'amatala mai ai i ana lava upu ni a'oa'oga sa maua mai i le tala.

#### **A'OA'OGA:**

1. Ia tatala la tatou vaai ina ia tatou manino ai i le malamalama o Keriso, ma avea ai tatou ma malamalama e susulu atu i le pogisa o lo o i ai le lalolagi.
2. Ia tutu le lamepa ma tu'u i luga, ina ia pupula atu ai lona malamalama i isi tagata.
3. O Iesu o lo tatou malamalama, tatou te malu ai mai faigata o le olaga.

**PESE:** Iesu e, o lo'u malamalama, Iesu e, Iesu e

O oe o lo'u lafitaga, Iesu e, Iesu e.

Tiga! Na punitia mai, le La i mea e tele mai

Ae ao pea lava pe a e i ai, Iesu e, Iesu e.

Malo lava mo le galuega o lenei taeao, ia fa'amanuia tele le Atua, ia tofi ane se tama e fa'ai'u le vasega i le tatalo.

**IA MANUIA LE ASO SA!!**

.....

## **ASO SA IUNI 08, 2025 (Aso Sa Penetekoso)**

**MATAUPU: “O LE AGAGA PAIA, LE MANA O LE TATALO”** (The Holy Spirit, promper of prayer)

**TUSI FAITAU:** Galuega 2: 1-18

**SINI:** Ia a’oa’oina pea tamaiti, i le taua ma le uiga o le Aso Sa Penetekoso, po o le tala i le afio ifo o le Agaga Paia mai le lagi.

### **FESOASOANI MO FAIAOGA:**

Talofa lava malo le soifua manuia i lenei taeao fou, faafetai i le Atua ua tatou aulia ma le manuia mai i lana pule faasoifua i lo tatou ola. Malo lava le pale faafetai le faatoatoa i tiute ma faiva sa feagai ai ma outou i le vaiaso. Ia papatisoina pea tatou e le mana o le Agaga Paia, tatou te loto tetele ai pea e galulue e faatino lo tatou ola valaauina. O le faamanatu lava ina ia tautuana lau tapenaga o le vaiaso, ia lava pea le taimi e su’esu’e ai le tusi faitau mo le mataupu.

### **SINA FA’ASOA MO LE MATAUPU:**

O le Aso Sa lenei o le Penetekoso, o le aso Penetekoso i le tu fa’alutaia, le aso lea na afio ifo ai le Agaga Paia, o le fa’amanatuina o le 50 aso talu ona uma le Paseka e fa’amanatuina ai le tuuina ifo o tulafono a le Atua i lona nuu. O le aso faamanatu la lea, o lea ua mafuta faatasi ai le au soo ma le au faatuatua i le mea e tasi i le loto e tasi e auai i le fa’amanatuina o le Penetekoso. A o le aso tonu lea o lea ua afio ifo ai le Agaga Paia.

E tusa ai ma le molimau a Luka i le faaiuga o le mataupu muamua o le tusi o Galuega, o le ausoo e to’a sefulu ma le toatasi lea ua potopoto faatasi, ma ua auai faatasi ma le tagata e igoa ia Matatia, lea ua filifilia e le ausoo e faaatoa ai le toa 12 o le au aposetolo, faatasi ai ma nisi o le au faatuatua. O latou la ia lea ua potopoto faatasi, ma e tusa ma le molimau a Luka ua faatasi uma “I latou i le mea e tasi, ma le loto gatasi.” E taua le faaupuga lea a Luka aua o lo o faailoa ai le usita’ia e le ausoo o le poloaiga a Iesu Keriso toetu, latou te le tu’ua Ierusalema se’ia papatisoina i latou i le Agaga Paia.

O lo o manino le fetalaiga a Iesu Keriso toetu i le ausoo i le la’asaga mulimuli o le tapenaina o i latou mo le galuega tala’i. Fai mai le fetalaiga a Iesu, “O le a maua e outou le mana, pe a afio ifo le Agaga Paia i luga ia te outou; e fai foi outou ma molimau ia te a’u i Ierusalema, ma Iutaia uma lava, ma Samaria, e oo lava i le tulu’iga o le lalolagi.” O le afio ifo la o le Agaga Paia i luga o soo o Iesu, o le faamanatuina lea o le tapenaina faaleagaga o le ausoo, o le faamanaina o i latou e le Agaga o le Atua mo le galuega tala’i, le galuega folafola, le galuega molimau, ma le galuega fa’amalolo o le tala lelei ia Iesu Keriso e ala i lona afio mai, lona maliu, ma lona toetu manumalo mai le oti ma le tuugamau, i lalo o le ta’ita’iga a le Agaga Paia.

O le mana o le Agaga Paia e ta’ita’iina ai le galuega molimau o le tala lelei. O le tele o galuega ma auaunaga e fa’atino e tagata e fua le talia o le tagata i nei galuega, ona o lou agavaa ma lou atamai ua maua. A fa’atalanoa se galuega e saili fa’ailoga, saili agavaa, saili le soifua maloloina o lo o lelei ma talafeagai ma le avanoa ua maua. A o le aveva ma tagata molimau mo le tala lelei ia Iesu Keriso, e fua i le mana ma le ta’ita’iga a le Agaga Paia. E fua i le papatisoga a le Agaga

Paia. E tatau ona saunia le tagata e papatisoina ma faamanaina o ia e le Agaga o le Atua e fai ai lana galuega molimau.

O le feau foi lea a Luka e uiga i le sauni atu o le ausoo ma tagata fa'atua e talai ma molimau i le tala lelei ia Iesu Keriso. E le faia i se potu ma se agavaa o se tagata. E le faia foi i se malosi o se tagata. O le mana o le Agaga o le Atua e nofo i luga o tagata ua valaauina e molimau ia Iesu Keriso, o iina e mana ma nanea ai le feau momoli. O lo o ta'ua e Luka i latou na latou maua le papatisoga i le Agaga Paia i le aso Penetekoso, fai mai, ua tautala mai i lana lava Gagana. O le faaupuga lea a Luka o lo o aumai ai se feau, e fa'aoga e le tala lelei Gagana a atunuu uma e momoli ai le feau o le fa'aolataga. E fa'ataua e le tala lelei lau Gagana ma lau aganuu.

### **GALUEGA FA'ATINO: Fesili fa'atupu manatu**

1. O ai le igoa o le tagata lea na auai faatasi ma le ausoo, na fa'aatoa ai le 12 o le ausoo?

**Tali:** O Matatia

2. O le a le poloaiga a Iesu na fai i lona ausoo, ina ua tu'ua i latou e pei ona aumai e Luka?

**Tali:** Latou te le tuua Ierusalem seia papatisoina i latou i le Agaga Paia.

3. O le a le uiga o le aso Penetekoso i le tu faaIutaia?

**Tali:** O le fa'amanatuina o le 50 aso talu ona uma le Paseka e faamanatuina ai le tuuina ifo o Tulafono a le Atua i lona nuu.

4. O le a se a'oa'oga na e maua mai i le tala o le Aso Sa Penetekoso?

### **A'OA'OGA:**

1. E le o lo tatou malosi ma lo tatou potu, a o le mana o le Agaga Paia e fa'amalosia lo tatou vaivai.
2. Ia fa'alagolago i le musumusuga a le Agaga Paia lo tatou fesoasoani sili.
3. O le faatalitali ma le onosa'i, e manuia ai a tatou taumafaiga uma.

**PESE:** O le Agaga Paia ma le afi

Na te fa'amalosiina a'u, fa'amalosiina a'u.

O le Agaga Paia ma le afi

Na te fa'amalosiina a'u.

Iesu, na te fa'amalosiina a'u.

Ia saunia e le faiaoga se tatalo e faai'u ai le vasega.

**IA MANUIA LE ASO SA PENETEKOSO!!**





**ASO SA IUNI 15, 2025**

**MATAUPU: “UPU O LE FA’AMOEMOE”** (Words of hope)

**TUSI FAITAU:** Isaia 40: 1-5

**SINI:** Ia a’oa’o pea le fanau, e i ai pea le fa’amoemoe mo le tagata pologa ma saisaitia, e pei ona aumai e le perofeta o Isaia.

**FESOASOANI MO FAIAOGA:**

Malo lava le lagi mama ma le soifua maua, viia pea le agalelei tausii mai o le Atua, ua tatou maua fiafia ai lenei aso fou i lona alofa. Faamalo foi le folau manuia, talitonu lava o loo manuia le gasologa o feau ma galuega o loo feagai pea ma outou. Ae o le tatou mataupu mulimuli lea o lenei afa muamua o le tausaga o lo’o tatou i ai. E avatu ai foi vai malu i puega, pe afai ua faatiga taliga atu mo a outou susuga i faiaoga, le taulogologo atu pea mo la tatou galuega. O le naunau lava, ia tatou galulue faatasi ae a alo ma fanau mo so latou lumana’i manuia. Faafetai, Faafetai tele lava.

**SINA MANATU MO LE MATAUPU:**

O le tala o lenei aso, o le feau a le perofeta o Isaia i tagata o le nuu o le Atua ua fatafea i Papelonia. Ua avea le faatafea ma suiga o latou olaga mai le sa’oloto i le saisaitia, ua avea ai foi latou ma tagata ua fa’apologaina. Ua le maua mea sa masani ona latou maua, ma ua pulea i latou i lalo o puipuga sa le masani ai. Ua oo lava i a latou tapuaiga ua saisaitia foi i totonu o Papelonia. Leitioa a amata le feau o le toe fausia o se faamoemoe fou mo tagata faatafea i le feau, o le momoliina o le faamafanafanaga i tagata o loo puapuagatia.

E lua faaupuga taua o loo i le fuaiupu lenei: Muamua o le faaupuga lo’u nuu. Lua, o le faaupuga, lo outou Atua. O le sootagata faafeagaiga osi lea i le va o Isaraelu ma le Atua na ia aumaia mai le pologa i Aikupito. O outou o lo’u nuu o a’u o lo outou Atua. A o lea ua toe amata ai le vaega lona lua lenei o le tusi a Isaia, e aumai ai le liliuina e le Atua o lona toasa i lana faamafanafanaga. Ua liliu e le Atua lona fultua i ona tagata i lona toe faauouo ma faamafanafanaina i lona nuu.

Na manatu lava tagata Iutaia ua tuulafoa’iina i latou e lo latou Atua. Na manatu lava tagata faatafea ua faia’ina ma to’ilalo lo latou Atua. Ae o lea ua toe faalogoina le feau mai lo latou Atua. O le feau o le faamafanafanaga. O le feau o le faamoemoe ola e suia ai le faanoanoa i le olioli, e suia ai le le mautonu i le mautinoa, e suia ai le ola pologa i le ola sa’oloto. O le feagaiga osi i le va o le Atua ma Isaraelu, o le feagaiga e faatino ai le faatau alofa a le Atua ma lona nuu. E alofa atu le Atua, ae alofa ane foi Isaraelu ma lona loto atoa, lona agaga atoa, ma lona malosii atoa.

Ioe tamaiti, e feagai pea tatou ma faigata ma puapuaga o le olaga lenei tatou te i ai, e i ai foi taimi a o’o ina fesouaiina lo tatou ola pe a fetuleni mai fa’afitauli ma faigata o le ola, ona tatou mafaufau lea ua le manatu mai le Atua mo i tatou. Peita’i, e le mafai ona tuulafoaiina tatou e le Atua, o loo i ai foi le faamoemoe o le Atua mo i tatou. O taimi tatou te le mautonu ai, e aumai ai

e le Atua le mautinoa i o tatou tagata, na te aumai foi le fiafia i taimi tatou te fa'anoanoa ai, na te fa'asa'oloto foi tatou mai mea o loo tatou pologa ai i leni lalolagi. O upu a Isaia, o se toe fa'amanatu foi lea mo tatou, e i ai lava le faamoemoe ola mo tatou uma, tusa lava po o le a lo tatou ola agasala ma leaga i luma o le Atua, e mutimutivale lava lona alofa mo i tatou o lana fanau.

**GALUEGA FAATINO: Faafetaui fuaitau nei**

1. O mauga uma ma mea maupuepue -- e fai ma mea laulelei
2. O mea faafatiatamai -- e faaeaina ia
3. O vanu uma -- e faamaulaloina ia
4. O mea gaoa -- e fai ma mea faalaugatasi ia

**A'OA'OGA:**

1. E i ai pea le fa'amoemoe ola o le Atua mo tatou tusa lava poo le a lo tatou leaga.
2. E le tuulafoaiina e le Atua o tatou tagata.
3. Tuu i le Atua mea uma tatou te mafatia ma saisatia ai, o ia na te faasa'olotoina i tatou.
4. Ia usita'i ma faalogo i le Atua e manuia ai.

**PESE: #224 (Pese ma Viiga)**

Faafetai atu mo le galuega o leni taeao, ia agalelei le Atua e tusa ma lo outou tautiga i lana galuega. Ia tofia se tamaita'i e fai le tatalo ma faai'u ai le vasega.

**IA MANUIA LE ASO SA!!**

.....

**ASO SA IUNI 22, 2025**

**MATAUPU: "SUEGA FAAI'U O LE AFA MUAMUA"**

**TUSI FAITAU:** Luka 11: 14-36, Galuega 2: 1-18, Isaia 40: 1-5

**SINI:** Ia suesueina pea mafaufau o le fanau, ina maua pea le manatua i tala o le Tusi Paia e pei ona faamatalaina i Aso Sa ta'itasi.

**FESOASOANI MO FAIAOGA:**

E le tauilo lo outou tautiga e tusa o lo outou valaauina aemaise o la outou galuega, o le tapu'eina ma fa'afailele fanau a le Ekalesia, ae a lo latou ola faaleagaga. Talitonu e le lava upu e avatu ai se faafetai, ae o loo silafia e le Atua mea uma o loo tatou faia, o ia foi na te faamanuia i le tagata ma lana e fai. O le tatou suega mulimuli leni o le afa muamua o leni foi tausaga, o loo i a outou susuga lava i faiaoga le faatinoina, ae ia tautuana ane ni nai faailoga mo le vasega ina ia faafiafia ai pea le fanau e omai i le aoga Aso Sa.

## **FAIGA O LE SUEGA:**

### **Mataupu: Vaai ma ave ma malamalama**

- 1. Fa'atumu avanoa i upu nei: tuugamoli, malamalama, pogisa, saito, lelei, pouliuli, lilo, leaga, moli, ulufale.**

E lelei se tutu i le \_\_\_\_\_, ma tuu i le mea \_\_\_\_\_, po o i lalo o le mea e fua ai \_\_\_\_\_, a e tuu i luga lava o le \_\_\_\_\_, ina ia iloa mai ai le malamalama i e \_\_\_\_\_ mai. O mata, o le \_\_\_\_\_ lea o le tino; o lenei, pe afai ua \_\_\_\_\_ ou mata, e \_\_\_\_\_ uma ai lou tino; a e afai ua \_\_\_\_\_, e \_\_\_\_\_ ai lou tino. O lenei, ia oe, ne'i \_\_\_\_\_ le malamalama ua i totonu ia te oe.

### **Mataupu: O le Agaga Paia, le mana o le tatalo**

- 1. O le a le Penetekoso i le tu faalutaia?**

**Tali:** O le faamanatuina o le 50 aso talu ona uma le Paseka e faamanatuina ai le tuuina ifo o Tulafono a le Atua i lona nuu.

- 2. O ai le igoa o le tagata lea na faaatoa ai le to'a 12 o le ausoo?**

**Tali:** O Matatia

- 3. O le a le poloaiga a Iesu na usitaia e le ausoo?**

**Tali:** Latou te le tuua Ierusalema seia papatisoina i latou i le Agaga Paia.

- 4. Na i ai nisi tagata e ese mai i le ausoo i le taimi na afio ifo ai le Agaga Paia?**

**Tali:** Ioe, o tagata faatuatua.

- 5. O le a se feau sa e maua mai i le Aso Sa Penetekoso? (tuu le avanoa e tali mai ai le vasega)**

### **Mataupu: Upu o le faamoemoe**

- 1. O ai na ave i ai le feau a le perofeta o Isaia?**

**Tali:** O le nuu o le Atua, o Isaraelu

- 2. O fea o loo i ai le nuu i lea taimi, ae o le a foi le mea ua tupu ia Isaraelu?**

**Tali:** O loo faatafea i Papelonia, ona ua le usita'i le nuu i le Atua.

- 3. A o a ni lagona ua o'o i le nuu ina ua faapologaina i Papelonia i lea taimi?**

**Tali:** Ua leai se faamoemoe ma ua mafaufau ua le manatu mai le Atua mo latou.

- 4. O le a le feau a Isaia mo le nuu?**

**Tali:** O le feau faamafanafana ma le faamoemoe ola mo Isaraelu.

- 5. O a la ni a'oa'oga taua ua e maua mai i le feau a le perofeta o Isaia?**

Malo lava le faamalolosi i le faatinoina o la tatou galuega i lenei afa muamua o le tausaga. O upu a le aposetolo o Paulo, 'e le se mea faaleaoga lo outou tautiga i le feau ma le galuega a le Atua.' Ia saili ane se pese ma fa'auma le vasega i le tatalo.

**IA MANUIA LE ASO SA, MANUIA FOI LE MALOLOGA O LE A FEAGAI AI!!**



**TUSI AOGA VASEGA MATUTUA FA'APITOA**  
**FA'ASOLOGA O MATAUPU O LE TUSI.**

<b><u>ASO/MASINA</u></b>	<b><u>MATAUPU</u></b>	<b><u>TUSI FAITAU</u></b>
1.Fepuari 02, 2025	“Teuteu le Ala”	Luka 3: 1-22
2.Fepuari 09, 2025	“Fai e pei ona ou faia, ae le pei ona ou fai atu”	Luka 6: 37-49
3.Fepuari 16, 2025	“O malosiaga o i ai”	Luka 2: 1-7
4.Fepuari 23, 2025	“SUEGA FA'AMANATU”	
5.Mati 02, 2025	“Iesu, le Ala, le Upum oni, ma le Ola”	Ioane 18: 28-40
6.Mati 09, 2025	“Fa'ailoaina o le Malo ua feliuaina”	Mataio 5: 1-12
7.Mati 16, 2025	“Fiafia i le ave a e fai ma So'o”	Ioane 15: 8-11
8.Mati 23, 2025	“O se mafutaga alofa – e Inosia”	Ioane 15: 18-25
9.Mati 30, 2025	“SUEGA FA'AMANATU”	
10.Aperila 06, 2025	“Fa'alataina”	Luka 22: 1-6
11.Aperila 13, 2025	“O toe Fouvalega”	Luka 22: 63-65
12.Aperila 20, 2025	“Ua toetu o Ia”	Luka 24: 1-8
13.Aperila 27, 2025	“SUEGA FA'AMANATU”	
14.Me 04, 2025	“I lalo o Vine ma Mati”	Mika 4: 1-4
15.Me 11, 2025	“Folafolaga, Folafolaga”	Iosua 1: 1-18
16.Me 18, 2025	“Fai ma sui o le Atua”	Iosua 7: 1-15
17.Me 25, 2025	“SUEGA FA'AMANATU”	
18.Iuni 01, 2025	“Vaai ma ave a ma Malamalama”	Luka 11: 14-36
19.Iuni 08, 2025	“O le Agaga Paia, le mana o le Tatalo”	Galuega 2: 1-18
20.Iuni 15, 2025	“Upu o le Fa'amoemoe”	Isaia 40: 1-5
21.Iuni 22, 2025	“SUEGA FA'AI'U O LE AFA MUAMUA”	

**Ia manuia galuega o le afa muamua o lenei tausaga.**

